

1 CORINTIOS

Pablo queétdih ã túyat tútat

¹⁻² Weém, Pablo, biíhdih daacát túttnit, yeéb Corinto tútchidih moón Jesúíhwãdih wã wahna caá. Dios weemdíh ñíonit, Jesucristoíh túini doonádih ã naáwát túttni wã jumna caá. Pánihni jumna, yeebdíh búdí wã túyat túttna caá. Wã úud panihni Sóstenesbut yeebdíh jenah joinít, búdí ã túyat túttna caá. Yeéb jwí Maáh Jesucristodih jepahnit, Dioíhwã ñi jumna caá. Nihat baácđih moonbút biíc yoobó jwí maáhdih úúbhñit, biícđih jumñit pah Dioíhwã jwí jumna caá. Jwiit nihatđih Jesús jwí Maáh ã jumna caá.*

³ Dios jwí íip, jwí Maáh Jesucristobut yeebdíh búdí oinit, í teo wáaca naáh, biícđih ñi túi jumát pínah niijná.

Dios ded pah queétdih ã túi teo wáacat

⁴ Diosđih úúbhna, “Paá, queét Jesúíhwãdih búdí oinit, ma túi teo wáacatđih túina caá”, wãpí niijná caá. ⁵ Pánih teo wáacna, ã jéihyanachah, ñi túi jéih naóh yapana caá. ⁶ Páant ã túi teo wáacachah, wã naóhñiji Jesúíh doonádih ñi túi joyóp jĩ. ⁷ Búdí ã teo wáacachah, yeebdíh dedé jéihcat pínah ã wihcan caá. Pánihna, Jesús ã jwúub dei júúwát pínahđih wēi pãinit, ã wēpatjĩh ñi míic túi teo wáacna caá. ⁸ Yeebdíh páantjeh ã túi teo wáacpina caá, caandíh ñi cádahcat pínah niijná. Páant ñi cádahcah, Jesucristo ã jwúub dei júúwáchah, yeebdíh yéejat peéh

* 1:1-2 Hch 18.1

chãjat ã wiŋcan niít. ⁹ Dios jwiít dih ã ñíwip jĩ, jwĩ Maáh Jesucristodih jwĩ túi pej jummat pínah niijná. Páant ã niijátji biíc yoobó ã chãjbiŋna caá.

Í míc jũihñatdih ã cádahat tútat

¹⁰⁻¹¹ Dios páant yeebdíh ã teo wáacachah yuhna, Cloéwã wã pebhna junít, ñi míc jũihñat doonádih weemdíh ã naáwáp jĩ. Páant ñi chãjachah, wã úudwã panihnitá, jwĩ Maáh Jesucristo ã wẽpatjĩh nin pah yeebdíh wã wutna caá: ¡Ñi míc jũihñatdih caanjĩhjuh ñi cádahaá! ¡Páant bóojeh! Yeebdíh túi biíc dih jummat caá náahap. Jesús ded pah ã jummatdih, ded pah ã bohéatdihbut biíc dih ñi túi jenah joyoó. ¹² Páant niijnít, nin pah wã naóhna caá. Yeéb biíc dih ñi túi jumcan caá. Biquína, “Jwiít Pabloíhwã caá. Caán chah túi bohéni caá”, ñi niijná caá. Bitá, “Jwiít Apoloíhwã jwĩ jumna caá. Caánboó chah túi naóhni caá”, ñi niijná caá. Bitá, “Jwiít Pedroíhwã caá. Caánboó chah túi jéihni caá”, ñi niijná caá. Bitá “Jwiítjuh Cristo ã bohéatdih yoobóp dih jéihnit caá. Pánih jumna, jwiítjuh ãihwã caá”, ñi niijná yuh caá.* ¹³ Obohjeéhtih, Jesucristo páant ñi jummat pínahdih át bohécap jĩ. Weém, Pablo, yeebdíh wun wũhni nihcan caá. Wã wẽpatjĩh nihcan jĩ yeebdíh ã daabánap jĩ. Jesús ã wẽpatjĩh ã daabánap jĩ, ãihwã ñi jummat jútat pínah niijná. ¹⁴⁻¹⁵ Crispo wũt jumni,* Gayo wũt jumni,* queét chénewá dihjuh wã daabánap jĩ. Bitadih wã daabácap jĩ. Yeebdíh wã daabánachah nihna, “Pabloboó ã wẽpatjĩh weemdíh ã daabánap jĩ”, ñita niij tágaá. Pánihna, “Queétdih wã daabácatjidih túina caá”, Diosdih wã

* **1:12** Hch 18.24 * **1:14-15** Hch 18.8 * **1:14-15** Hch 19.29; Ro 16.23

niijná caá. ¹⁶ ¡Cáaj! Estéfanaswādh wā quíib b̄ud̄ap be. Queétdihbut wā daabánap jī. Obohjeéhtih, “Bitadh wā daabácap jī”, wā niíj jenah joiná caá.* ¹⁷ Cāacwādh daabáni pínah Jesús weemdíh wahcan, āih táini doonádh naáwát túutna, ā wahap jī. Jwiít cāacwā jwī jenah joyátjīhjih ā naáwát túutcap jī. Páant wā naáwáchah nihna, joinítboó “Caán tá naóhni caá”, niijnít, weemdíhjih ĩta wēi jenah joi tága. Jesúsdh ĩta jenah joicán taga. Obohjeéhtih, Dios ā wēpatjīh yoobópdih āih doonádh weemdíh ā naáwát túutap jī, Jesús cruzboó ā w̄n w̄hatjidih ĩ táí jenah joyát pínah niijná.

Cristo Dios ā jéihyat, ā wēpatdh j̄utni caá

¹⁸ Jwiít Jesús cruzboó ā w̄n w̄hatji doonádh joinít, caandíh jwī jepahachah, Dios ā wēpatjīh jwiítdh ā táí ubna caá. Obohjeéhtih, Jesúsdh jepahcannit iiguípna bejnit pínah, cruzboó Jesús ā w̄n w̄hatji doonádh joinít, nin pah ĩ niíj jenah joiná ȳh caá: “Dedé pínah nihcan jī. Páantjeh āt w̄njehep w̄t jī”, ĩ niíj jenah joiná caá.* ¹⁹ Páant ĩ niiját biíc yoobó Dios naáwádh naóh yapani nin pah āt niíj daacáp tajī:

“Dios nin pah ā niijná caá: ‘Cāacwā ĩ bohéatdhjih táí jéihna ȳhna, weemdíh ĩ jenah joicát jīb ĩ b̄ud̄b̄pna caá’, ā niijná caá”, āt niíj daacáp tajī. *(Is 29.14)*

²⁰ Diosdh jéihcannit ĩ jenah joyátjīhjih bádí ĩ jéihyechah ȳhna, Dios ĩ jéihyatdh “Dedé pínah nihcan caá”, ā niíj jenah joiná caá. Pánihna, jwiít cāacwā jwī jenah joyádhjih bohénit, ĩ táí jéihna

* **1:16** 1Co 16.15 * **1:18** Ro 1.16

yuhna, jeáboó ã bejcan niít. Moisés ã wutattjidih bohénit, túi naóhntbut jéihna yuhna, Dios pebhna ã bejcan niít.* ²¹ Dios nihattidih jéihni jumna, nin pah át niíj jenah joyóp wut jĩ: “Cãacwã ã jenah joyátdihjeh jéihntidih wã túi ubcan niít. Obohjeéhtih, wã wãúh ã wun wãhatdih jenah joinítdihjeh wã túi abbipna caá”, át niijíp wut jĩ. Jesúih doonádih jwĩ bohénachah, jepahcannitboó “Oboh ã naáwátjeh caá”, niíj jenah joinít, bũudnít ã jumbipna caá.

²² Jwiít judíowã nin pah jwĩpĩ niíj jenah joiná yuh caá: “Dios ã wēpatdih ã júutcah, caandih jwĩ jepahcan niít”, jwĩ niijná caá. Yeéb judíowã nihcannit nin pah ñipĩ niíj jenah joiná yuh caá: “Dios ded pah ã jumattidih jwĩ jenah joyátjĩhbeh joicán, caandih jwĩ jepahcan niít”, ñi niijná caá. ²³ Obohjeéhtih, jwiítboó nin pah jwĩpĩ niíj naóh bohéna caá: “Jesucristo cruzboó jwiítidih át wun wãhup tajĩ”, jwĩ niijná caá. Páant jwĩ niíj bohéatdih joinít, jepahcannit judíowã nin pah ã niíj jenah joiná yuh caá: “Obohjeéhtih, Dios ã wahní jwiítidih túi ubni pínah wancanjeh, jwĩ maáh ã jumbipna caá. Pánihna, Jesús wunah bejna, caánboó jwĩ páini nihcan caá”, ã niíj jenah joiná caá. Páant niíj jenah joinít, Jesúih doonádih ã yap yohna caá. Judíowã nihcannitboó nin pah ã niíj jenah joiná yuh caá: “Ï yee naáwátjeh caá”, niíj jenah joinít, queébtbut Jesúih doonádih ã yap yohna caá. ²⁴ Obohjeéhtih, biquína jwiít judíowãdih, yeéb judíowã nihcannitdihbut Dios ã ñíwichah, Jesúih doonádih túi jói jepahnit, nin pah jwĩ niíj jéihna caá: “Dios chah

* **1:20** Job 12.17; Is 19.12; 33.18; 44.25

wēpni, nihat jéihni jumna, cāacwādh tái ubat túut niijná, Jesúsdih át wun wūhat túutur tajī”, jwī niijná caá. ²⁵ Páant ā nīwichah, āihwā jumna, nin pah jwī niij jéihna caá: “Jwiit cāacwā jwī jenah joyát chah Dios át jenah joi tága. Jwiit cāacwā jwī wēpat chah Dios ā wēpna caá”, jwī niijná caá.

²⁶ Páant wā naáwátdih jenah joinít, Dios yeebdíh ā nīwichah, ded pah nī jummatdihbut nī tái jenah joyoó. Wā údwā panihnitá, bita yeebdíh ennit, “Queét bohécannit, dinero wihcannit jumna, oboh jumnit caá”, it niij jenah joyóp tajī. ²⁷ Obohjeéhtih, “Jéihcannitjeh caá”, cāacwā ī niijnít dih Dios át nīwip taga. Pánih nīona, jéihnitboodíh “Búdí bohéna yuhna, wā jéihyat dedé pínah nihcan caá”, Dios queétdih át niij jéihyanap taga. Oboh jumnitdihbut ā nīwichah ennit, “Wā wēpat dedé pínah nihcan caá”, maátadih át niij jéihyanap taga. ²⁸ Oboh jumnit, bita ī deohnit, bita ī enah bojnitdihbut Dios át nīwip taga. Pánih nīonit, “Jwiit cāacwā jwī jéihyat weemdíh ā jumachah yuhna, dedé pínah nihcan caá”, jwiitdih át niij jéihyanap taga. ²⁹ Pánihna, Dios pehbhoó jubínit, “Wā jéihyatjīhjah wā jūwáp be”, jwī niij jéihcan niit. ³⁰ Obohjeéhtih, Dios caá jwiitdih át teo wáacap taga, Jesucristodih jepahnit, āihwā jwī jummat pínah niijná. Pánih āihwā jumna, Jesús ā jenah joyát pahjah muntih Dios jwiitdihbut ā jenah joyát túutna caá. Ā wun wūhatdih jwī tái jenah joyóchah, jwiit āihwādh “Caánboó túini caá. Wā peéh chājcan niit”, Dios ā niij enna caá. ³¹ Nin pah Dios naáwátdih naóh yapani át niij daacáp tajī: “ ‘Weemdíh dedé jūdhdah wihcan caá’, niijnít ī jumca bojo naáh. Obohjeéhtih ‘Jwī Maáh Dios

nihat jéihni, weemdíh ã táí teo wáacáp be', niijnít ï j̄m̄m̄ naáh", ãt niíj daacáp tajĩ. *

2

Cristo ã w̄m̄n w̄h̄atj̄i

1-2 Wã úudwã panihnitá, ñi pebhna jwíih j̄uibína, ded pah wã j̄matjidih ñi táí náhninaá. Ñi pebhooó wã bejat pínah jãtíh nin pah wã niíj jenah joyóp jĩ: “Jesucristo ded pah ã j̄matjidih bohéna, jwiítidih ã w̄m̄n w̄h̄atjidih queétdih wã jéihyabipna caá”, wã niíj jenah joyóp jĩ. Páant niíj jenah joinít, Dios weemdíh ã jéihyani doonádih táinijeh yeebdíh wã naóh bohénap jĩ, “Pablo nihat jéihni caá”, ñi niíj jenah joicát pínah niijná. 3 Ñijeéh j̄m̄na, nin pah wã niíj jenah joyóp jĩ: “¿Yoobópdih niít wã bohénap? ¿Jesúsdi h̄ táí jepahmi naniít? ¿Jepahcan, íijnit, weemdíh ï yoh bacami naniít?” niíj jenah joinít, búdí wã úum̄m̄p jĩ.* 4 Jwiít cáacwã jwĩ jenah joyátj̄ihjeh wã naóh bohécap jĩ. Obohjeéhtih, Túini Espíritu ã wēpatj̄ih yeebdíh táinijeh wã bohénachah joinít, Dios ded pah ã wēpatdih ã j̄úutuchah ennit, Jesúsdi h̄ ñi jepahap jĩ. 5 Pánihna, “Pablo ã táí jéihyatj̄ihjeh jwiítidih ã jepahat túutcap jĩ. Obohjeéhtih, Dios ã wēpatj̄ih ã chãj j̄úutuchah ennit, Jesúsdi h̄ jwĩ táí jenah joyóp jĩ”, ñi niiját pínah niijná, páant wã bohénap jĩ.

Túini Espíritu ded pah Dios ã j̄matdih ã jéihyaat

6-7 Diosdi h̄ jéihcannit ï jenah joyát dedé pínah nihcah, Diosboodíh táí jenah joyát caá náahap. Diosdi h̄ táí jenah joinítidih nin pah wãpĩ niíj naóh

* 1:31 Jer 9.23-24 * 2:3 Hch 18.9

bohéna caá: “Dios nihat jéihni jumna, jwiít dih táí ubat táut niijná, Jesús dih át wahjip taga. Pánih chājna, jeáboó jwī jubínachah, chah táinidihbut jwiít dih ā chāj bipna caá”, wāpī niij naóh bohéna caá. Nin baác dih moón maáta ī jengah joyát chah Dios ā jengah joyát caá. Queétboó ī wunuchah, ī jengah joyátjidi bita ī náhnican niit. Obohjeéhtih, Diosboó nin baác dih ā chājat pínah jātih, Jesús dih ā wah deyaat pínah dih átát jengah joiijp taga. Jon jātih páant niij jengah joiná yuhna, jwiít cāacwā dih át jéihya jwuhcap taga. ⁸ Páant ā jengah joyátjidi nin baác dih moón ī maátaboó it beh joicáp jī. Ī beh joiná nihna, nihat jéihni, chah wēpni, jwī Maáh Jesucristodih ita mao yohcan taga. ⁹ Dios páant ā niij jengah joyátjidi cāacwā ī beh joicáh yuhna, ā naáwát dih naóh yapani nin pah át niij daacáp tajī:

“Caandíh oinit dih ded pah Dios táini ā chājat pínah dih jwiít cāacwāboó encan, joicán, jwī jengah joi jwúhcan caá. Ded pah jwī jengah joyát chah ā táí jumbipna caá”, át niij daacáp tajī. *(Is 64.4)*

¹⁰ Páant ā jéihya jwuhcah yuhna, ā jengah joyátjidi buu jwuhna Túini Espírituboó jwiít dih ā jéihyana caá. Caán Túini Espiritu nihat jéihni, Dios ā jengah joyát dih ā táí jéih beedána caá.

¹¹ Jwiít cāacwā biih ā jengah joyát dih jwī jéihcan caá. Caanjéh caá ā jéihyep. Pánihat pah, jwiít cāacwā Dios ā jengah joyát dih jwī jéihcan caá. Āih Túini Espiritujeh caá caandíh ā jéihyep. ¹² Dios dih jéihcannit ī jengah joyát pah jengah joiná, Dios ā jengah joyát dih jwī beh joicán caá. Páant jwī beh joicáh, āih Túini Espiritu dih jwiít dih Dios ā wūhup

jĩ, ded pah oinit, ã tái chãjatjidih jwĩ jéihyat pínah niijná. ¹³ Páant ã jéihyanachah, ã wēpatjĩh jwiítbüt yeebdíh jwĩ jwúub bohéna caá. Diosdih jéihcannit ĩ jenah joyát pah jenah joinít, jwĩ bohécan caá. Obohjeéhtih, Túini Espíritu ã jéihyanachah, bitadih jwĩpĩ bohéna caá.

¹⁴ Jesúsdih jepahcannit, Túini Espíritu wihcannit, caán ã bohéatdih náahcan, “Dedé pínah nihcan caá”, ĩ niúj jenah joiná yuh caá. Pánihna, Túini Espíritu ã teo wáacchah, ã bohéatdih queét ĩ jéih beh joicán caá. ¹⁵ Túini Espíritu ã teo wáacachah, Dios ded pah ã bohéatdih jwiít Jesúhwã jwĩ jéih beh joiná caá. Pánih beh joiná, ã weñat pínahdih jwĩ jéih chãjna caá. Obohjeéhtih, Jesúsdih jéihcannitboó páant jwĩ chãjachah ennit, Dios ã weñat pínahdih beh joicán, “¿Dépanih tigaá queétboó páant ĩ chãj?” ĩ niijná caá. ¹⁶ Páant ã jumat pah jon jãtih Dios naáwãtdih naóh yapani Isaías nin pah ãt niúj daacáp tajĩ:

“Dios nihat jéihni ã jumuchah, jwiít cãacwãboó ded pah ã jenah joyãtdih jwĩ jéih beedácan caá. Pánih jéihcannit jumna, caánboodíh jwĩ jéih bohécan caá”, ãt niúj daacáp tajĩ.*

Obohjeéhtih Túini Espíritu ã teo wáacachah, jwiítboó Jesucristo ded pah ã jenah joyãtdih jéihna, ã weñat pínahdih jwĩ jéih chãjna caá.

3

Pablo, Apolosjĩh Diosdih oboh teo wãhñitjeh ĩ jumat

* **2:16** Is 40.13; Ro 11.34

1 Yeéb wã údwã panihnitá, Jesucristodih jepahna yuhna, páantjeh jáap jéihnit pah ñi jamna caá. 2 Yeebdíh maatápdih wã bohénachah yuhna, wébít páantjeh nom jwuhnit dée pah ñi jamna caá. Páant ñi jamachah, ñi túi beh joyát pínah niijná, buocannidihjeh yeebdíh wã naóhna caá. Pánihna, nom jwuhnitdih jeémátdih jwĩ wáhcat pah, buoni bohéatdih yeebdíh wã jéih naóh jwuhcan caá. ¿Dépanihna, páant ñi jam?*

3 ¿Dépanihna Túini Espíritu wihcannit pah Dios ã weñat pínahdih ñi chájcan? Túini Espíritu wihcannit pah jamna, tubít míic júihnit, míic íjjanitbat ñi jamna caá. Jesucristodih jepahcannit biíc yoobó ñi chájna caá. 4 Yeéb biquína “Weém Pabloíh caá”, niijnít, bita “Weém Apoloíh caá”, niijnít, tubít ñi míic íjana caá. Pánih míic íjana, Diosdih jéihcannit dée pah ñi jamna caá.*

5 Biquína “Pablo caá chah jéihni”, niíj jenah joí, bitabut “Apolos caá chah jéihni”, ñi niíj jenah joiná caá. Páant ñi niíj jenah joicá bojoó. Jwiít bohénit nihát biíc yoobó Diosdih teo wáhnitjeh jwĩ jamna caá. Ded pah ã wutuchah, caandíh jepahnitjeh, yeebdíh jwĩ bohénap jĩ. Páant ã wutuchah, jwĩ bohénachah joinít, Jesucristodihjeh yeéb ñi jepahap jĩ. 6 Nin pah ã jamna caá: Pácáhidih momni dée, weém jĩi yeebdíh Jesúih doonádih wã jwíih naáwáp jĩ.* Páant ã momat túttimah, pácahi en daoní dée, Apolos yeebdíh ã jwúub bohénap be, chah ñi jéihyat pínah niijná.* Obohjeéhtih, momnidih Diosjeh chíhanit, ã behana caá. Pánihat pah

* 3:2 He 5.12-13 * 3:4 1Co 1.12 * 3:6 Hch 18.4-11 * 3:6 Hch 18.24-28

Diosjeh túut nuumát túutnit, yeebdíh ã jéihyana caá. ⁷ Momni, en daoníbut oboh jumnitjeh caá. Diosjeh ã chíihana caá. Pánihna, weém wã túi naawáchah yuhna, Apolosbut ã túi bohénachah yuhna, Dios yeebdíh ã jéihyacah, ñita beh joicán tagaá. Páant ñi beh joicán, caandíh ñita jepahcan tagaá. ⁸ Pácahidih momni, en daoníbut, Dios ã enechah, biíc yoobó ï jumna caá. Dios ã wēpatjīh biíc ã túi bohéatdih ennit, ã pebhboó ã juibínachah, Dios chah ã jíib chāj bipna caá. Obohjeéhtih biíhboó ã túi bohécatdih ennit, namp ã jíib chāj bipna caá. ⁹ Jwiít nihat Dios ã watatdih jepahnit, yeebdíh jwī bohéna caá. Yeébboó Dioíh pácahi dée, ãih muú dée ñi jumna caá. ¹⁰ Dios weemdíh ã túi teo wáacachah, weémboó yeebdíh wã jwíih bohénap jī. Muú chājna, túini jíhlo jwio náhdih ñíonit, ï dodhdát dée, weémboó yeebdíh wã jwíih túi bohénap jī. Túttimah, muú chājnit dée bita yeebdíh ït jwúub bohénap taga. Túini muú chājnit dée, jwiít bohénitboodíh Dios ã wēpatjīhjuh túi bohéat caá náahap. ¹¹ Túini jagáp nahdih ï dodhdát dée, Jesucristo ã wun wúhatjidih wã jwíih bohénachah, ñi jepahap jī. ¹² Maatápdih jumni pínah muudíh chājíhna, túini máa nahnadih ñíonit, túi chājat caá náahap. Pánihat pah, yeéb Dioíh muú dée ñi jumuchah, ñi jepah cádahcat pínah niijná, wã túttimah jūóhndih Túini Espíritu ã wēpatjīh yoobópdih bohéat caá náahap. ¹³⁻¹⁴ Pánih chājna, Jesús jwúub dei jūóhna, muudíh ï túi chājat dée, ï túi bohéatji jíib, Dios ã túi chāj bipna caá. ¹⁵ Obohjeéhtih, muudíh ï túi chājcat dée, ï túi bohécatji jíib, ã túi chājcan niít. Queét túi bohécannitboó Dios pebhna ï juibínachah yuhna,

Túini Espíritu ã teo wáacatjĩh ĩ bohécah, Dios queétdih ã túi chãjcan niít. ¹⁶ Pánihna, “Jwiít biíc dih Dioíh muiú dée jwĩ jumuchah, Túini Espíritu jwĩjeéh ã jumna caá”, ñi niíj túi jenah joyoó.* ¹⁷ Pánih jumna, ãihwãjeh jwĩ jumuchah, ded yeéb biíc dih ñi jummatdih ã yééjanachah, Dios caandih búdí ã peéh chãjbipna caá.

¹⁸ Biquína nin pah ñi niíj jenah joiná caá: “Weém túi jéih beedáni caá. Dedé weemdih judhcan caá”, ñi niíj jenah joiná yuh caá. Obohjeéhtih, páant niíj jenah joinít, yeebjéh ñi míc yeena caá. Páant ñi niíj jenah joyátdih yeebdih cádahat caá náahap. Pánih cádahnit, túut nuumná, nin pah ñi jwúub niíj jenah joyoó: “Weém bainí jéihnijeh jumna, yoobópdih jéihyat túut niijná, Dios ã teo wáacatdih búdí wã náahna caá”, ñi niíj jenah joyoó. ¹⁹ Diosboó caandih jepahcannit ded pah ĩ jenah joyátdih ennit, “Dedé pínah nihcan caá”, ã niijná caá. Páant niijná, nin pah jon jãtĩh ãt niíj daacát túutup tajĩ: “ ‘Jwiít chah jéihnit caá’, niíj jenah joinít dih wã yohbipna caá”, ãt niíj daacát túutup tajĩ.* ²⁰ Davidjiboodih biíc yoobó nin pah ãt niíj daacát túutup tajĩ: “Weemdih jéihcannit ĩ jenah joyátdih ennit, ‘Dedé pínah nihcan caá’, ãt niíj daacát túutup tajĩ.* ²¹⁻²² Biquína yeéb nin pah ñi niíj jenah joiná yuh caá: “Pablo chah jéihni ã jumuchah, weém ãih jumna, weembát chah jéihni wã jumna caá”, ñi niíj jenah joiná caá. Bitabut Apolosdih, Pedrodihbut biíc yoobó ñi niíj jenah joiná yuh caá. Obohjeéhtih, páant ñi niíj jenah joyát yoobópdih nihcah, túut nuumát

* **3:16** 1Co 6.19; 2Co 6.16 * **3:19** Job 5.13 * **3:20** Sal 94.11

caá náahap. Yeéb jwíihwã nihcah, jwiít yeebdíh bohénitboó ñíihwã jwí jumna caá. Dios jwiít dih yeéb nihatdih át wãhup taga. Páant yeebdíh ã wãhuchah, jwiít nihat yeebdíh teo wáacnit jwí jumna caá. Yeebdíh teo wáacnit dih wãhnit, nin baácboó ñi jam jwãhuchah, páantjeh ã túi chãjbipna caá. Wunnit, ã pebhboó ñi juibínachah, chah túini ã wãhbirna caá. Buh láa Dios yeebdíh túi teo wáacna, túttimah bóo láabut, chah ã teo wáacbirna caá. Pánihna, nihat túini ã wãhni ñíih ã jumna caá. ²³ Yeéb Cristoíhwã jumna, caánboó Dioíh ã jumuchah, yeebbát Dioíhwã ñi jumna caá.

4

Cristo ã naáwát túutnit ded pah í jumat

¹ Jwiít yeebdíh bohénit dih “Queét Jesucristodih teo wãhnitjeh caá. Dios cãacwãdih ã jéihya jwãhca naáhdih Pablowãdih át bohé jibat túutup taga”, níj jenah joyát caá náahap. ² Det teo wãhnit dih í maátadilhjeh túi jepahat caá náahap. Pánihat pah, jwiít Jesús dih teo wãhnit jumna, jwí Maáh ded pah ã bohéát túutuchah, jwiít dih yoobópdih bohéát caá náahap. ³ “Caán Pablo túi yoobópdih ã bohécan caá”, yeéb ñi níjíchah yahna, weémboó wã jãgahcan caá. Bitabut bíic yoobó í níjíchah yahna, bíic yoobó wã jãgahcan níit. Weemjéhubt “Dios ã bohéát túutatjidih wã túi bohécan beé”, wã níj jenah joicán caá. ⁴ “Dios dih jepahnit, yoobópdih wã bohécan caá”, níj jenah joicán yahna, “Weém túi yoobópdilhjeh bohéni caá. Dedé yéejat jíib weemdíh ã wihcan caá”, wã jéih níjicán caá. Jwí Maáh Jesucristojeh weemdíh ennit, “Meém ma túi

bohénap be”, niijní pínah caá.* ⁵ Jwĩ Maáh Jesús ã jwúub dei jüúwát pínah játih, yeéboó ded pah jwĩ bohéát, bita ĩ chãjatdihbut ennit, “Caánboó jwĩ Maáh ã wutatdih ã túi chãjcan caá”, niijcát caá náahap. Obohjeéhtih, jwúub dei jüóhñit, Jesúsboó ded pah jwĩ bohéátjidih jwiít dih ã naóhbipna caá. Jwiít cáacwãboó ded pah biíh ã chãjatdih, ã jenah joyát dihbut jwĩ jéihcan caá. Jwiítjehbut jwĩ jenah joyát dih jwĩ jéih beedácan caá. Diosjeh caá ã jéihyep. Pánihna, Jesús jwúub jüóhñit, nihat jwĩ chãjatjidih, nihat jwĩ jenah joyátjidihbut ã naóhbipna caá. Caán láajeh caá “Meém ma túi chãjap jĩ”, jwiít dih ã niij naóhbipna caá.

⁶ Wã úudwã panihnitá, pánih naóhna, ñi túi beh joyát pínah niijná, ded pah jwiít Apolosjĩh jwĩ jummatdihjeh wã naáwáp be. Ded pah jwĩ jummatdih ennit, biíc yoobó yeebút ñi jéih jumbipna caá. Dios ã daacát tútatdih jepahna, “Yeebdíh bohéni ã jéihyat chah jwiít dih bohéni ã jéihna caá. Pánihna, meém ma jéihyat chah caá wã jéihyep”, ñi míic niijcá bojó ⁷ “Caán bohéniboó chah jéihni ã jumuchah, caandíh caá jwĩ náahap”, ñi niijcá bojó. Nihat ñi bíbohatdih Dios yeebdíh wãhñijeh caá. Jwĩ bohéát dih ñi joyóchah, Dios caá yeebdíh át beh joyánap taga. Ñi jenah joyátjĩhjeh ñi beh joicáp be. Pánihna, ĩ jéihyatjĩhjeh beh joinít dée, yeebdíh nin pah niijcát caá náahap: “Weemdíh bohéni túi jéihni ã jumuchah, weembút túi jéihni jumna, Jesúih doonádih weemjéh wã túi beh joyóp be”, niijcát caá náahap.

⁸ Yeéb nin pah ñi niij jenah joiná caá. “Jwiítboó

* 4:4 1Jn 3.19-21

Dioíh doonádih túi jéih beedánit caá. Jwiít dih dedé jwdhdát wihcan caá. Túini Espíritu nihát ã wũhni wēpat jwiít dih ã jumna caá. Pablowã ĩ wihcah yũhna, jwiítjeh maáta jwĩ jumna caá”, ñi niíj jenah joiná yũh caá. Obohjeéhtih, jwĩ Maáh Jesús ã jwáub dei jũwúchah, caán biíc dih maáta yoobóp dih ñi jumuchah, áta túi taga. Pánih jumna nihna, jwiítbut ñijeéh maáta jwĩta jum taga. Nihat yeejép yapat áta péa taga. Obohjeéhtih, páant ã yap jwũhcan caá. ⁹ Weémboó nin pah wã niíj jenah joiná caá: “Jwiít Dios ã naáwát tút nit dih oboh jumnit, peéh mawat pínah dih páinit pah bitaboó ĩ enna caá. Nihat cãacwã, nihát Dioíh ángelwãbut ded pah jwiít dih ã yapat pínah dih jéihyat tút niijná, jwiít dih enna caá ĩ chãjap”, wã niíj jenah joiná caá. ¹⁰ Pánih ennit, “Jesucristoíh doonádih naóhna, queét dedé pínah nihcan caá”, jwiít dih ĩ niíj enna caá. Obohjeéhtih, “Queét Jesúsíhwã jumna, dedé jéihcat pínah wihcan caá”, yeébbodíh ĩ niíj enna caá. “Queét wēp naóh nit nihcah, queét dih jwĩ jepahcan niít”, jwiít dih ĩ niíj jenah joiná caá. Obohjeéhtih, “Queét ĩ túi wēp naáwáchah joinít, nihát cãacwã ĩ tút nuumbípna caá”, yeébbodíh ĩ niíj jenah joiná caá. Pánihna, dawá yeebdíh wēi naóh nit, jwiítbodíh ĩ iiná caá. ¹¹ Jwiít jwĩ bohé jibichah, nuugúp tubna, ãpĩ taca joót na caá. Jwiít dih túini yégueh wihcan, muubút wihcan caá. Jwĩ naáwáchah joinít, íijna, jwiít dih dawá láa bita ĩ mawap be. Jwĩ jib bohé jwíhipmant, buubut biíc yoobó ã yapna caá. ¹² Jwĩ náahat dih jíib chãjat tút niijná, búdí teonit, jwĩpĩ chũná caá.* Cãacwã jwiít dih yeejép ĩ

* **4:12** Hch 18.3

naáwáchah joinít, yeejép naóh jwúubacanjeh, Dios queédih ã teo wáacat pínahdih jwĩpĩ úubhna caá. Yeejép ï chãjachah yuhna, jwĩpĩ enah bojna caá. ¹³ Yeejép dooná ï naáwáchah joinít, “¿Biíc dih jwĩ jéih jumcan niít?” jwĩpĩ niij jwúubana caá. Nihat cãacwã ï yohni pah jwiít dih ïpĩ enna caá. Jwĩ bohé jwíhipmant buubut biíc yoobó jwiít dih ï jenah joiná caá.

¹⁴ Caandih daácna, ñi tícat pínah nihcan, yeéb wã weh panihnit dih oina, ñi túut numát pínahdih náah yacnit, páant wã niij daacáp be. ¹⁵ Nin wã naáwát pínahdih ñi jenah joyoó: Weém ñi íp panihni caá. Yeebdih wã bohéat túttimah, dawá Jesúih doonádih bohénit ï jumuchah yuhna, weemjéh beé yeebdih jwíih naóhni. Páant wã jwíih naáwáchah joinít, Jesucristodih ñi jepahap jĩ. ¹⁶ Ñi íp panihnjeh yeebdih oinit, páant wã niij naáwáp be. ï mána ded pah ï jumatdih ennit, wébítbut biíc yoobó ïpĩ chãjna caá. Pánihna, ñi íp panihni ded pah wã jumatdih ennit, yeebbút biíc yoobó ñi chãjaá.*

¹⁷ Páant ñi chãjat pínahdih náah yacnit, Timoteodih ñi pebhna wã wahna caá. Jesúih doonádih wã naáwáchah joinít, caanbút ã jepahachah, wã wúuh pah wã oini ã jumna caá. Nihat tútchinadih moón Jesúihwãdih ded pah bohéna, biíc yoobó wãpĩ chãjna caá. Ded pah wã chãjachah enniji yeebdihbut ã jwúub náhniabipna caá. ¹⁸ Obohjeéhtih, biquína yeéb nin pah ñi niij jenah joiná caá: “Jwiít chah jéihnit caá. Dedé pínah Pablo jwiít dih ã jéih bohécan niít. Jwiít dih úumnit, ã júóhbican nacaá”, ñi niij jenah joiná

* **4:16** 1Co 11.1; Fil 3.17

yuh caá. ¹⁹ Obohjeéhtih, jwĩ Maáh ã wahachah, waícanjeh ñi pebhna wã juibíipna caá. Juibínit, páant niíj naóhnitabeh ded pah ĩ chājatdih wã enbipna caá. Jesúih doonádih ĩ naáwáchah, ¿Bita ĩ túut nuúm niít? ¿Oboh ĩ niijátjeh caá? ²⁰ Queét Dios ã wēpatjĩh yoobópdiĥ ĩ naáwáchah, queét dih joinítboó jepahnit, ĩ túut nuumbípna caá. Obohjeéhtih, páantjeh ĩ naáwáchah, cáacwã ĩ jepahcatdih wã jéihbipna caá. Jesúihwã jumna, ded pah naóhna, Dios ã wēpatjĩh ĩ chāj b ipna caá. Oboh naóhna, ĩ chājcan niít. ²¹ Pánihna, ñi pebhna juibínit, wã juihñatdih náahcan, ñi túut nuúm páñaá. Páant ñi túut nuumúchah, ñi íp pah yeebdíh oinit, chaíhjih wã naóhbipna caá.

5

Yeejép yoobát pohba chājnidih ĩ yohat pínah

¹ Buh yeebdíh bainí wã jwúub naáwát túut caá. Ñi pebh chah yeejép chājat doonádih wã joyóp be. Ñi cātíh tubit yéj chājni ã íp áadihjih át bíbohop wut be. Jesúsdih jéihcannit páant yeejép ĩpĩ chājcan caá. Obohjeéhtih, yeéboó Jesúsdih jéihnit jumna yuhna, páant ã chājatdih ñi enah bojna caá.* ² “Jwĩ Maáhdih túi jepahnit, jwiít dih dedé yéejat wihcan caá”, niíj jenah joiná yuhna, tíccan, jġgahcan, caán yeejép chājnidih ñi túut nuumát túutcap be. Páant ñi túut nuumát túutcan, buh páantjeh ã yéj chājat jíib, yeéb ñi míic wáac juínit, caandíh ñi jwúub waadát túutca bojoó. ³ Weémboó ñijeéh wihcan yuhna, caán doonádih joinít, búdí uúbhna wã chājap be. Pánihna, ñijeéh wã jummat pahjeh, ded pah caandíh

* 5:1 Dt 22.30

ã yéejat peéh chãjat pínahdih Jesús weemdih ã jéihyanap be. ⁴⁻⁵ Páant ã jéihyanachah, nin pah yeebdih wã niij naóhna caá: Caandih ã yéejat peéh naáwát túut niijná, yeéb ñi míc wáacá. Pánih míc wáacna, ñijeéh wã jumat pah, Jesús ã wēpatjih nin pah caandih ñi niiji: “Jwĩ jwúub míc wáacachah, ma waadcá bojoó. Nemépwã ñ maáh ded pah meemdih yeejép ã chãjihna, ã chãja naáh, ma jwúub túut nuumát pínah niijná. Pánih túut nuumnit, Jesús ã jwúub dei júuwáchah, ãjeéh ma bejat pínahdih meemdih jwĩ náah yacna caá”, caandih ñi niiji.

⁶ Pánih yéej chãjni ñijeéh ã míc wáacachah, yeébboó “Jwiit Jesúihwã jwĩ táí jamma caá”, ñi niij jenah joyóchah yuhna, ã táican caá. Nin pah jwĩpĩ niij naáwátdih ñi táí jéihna caá: “Búdí pan pínahdih ã paáát pínah bainíbitjeh jwĩ widichah yuhna, nihat ãpĩ paa béjna caá”, jwĩ niijná caá. Pánihat pah, biícjeh ã yéejatdih cádahíhcan, nihat Dioíhwã biíc dih míc wáacna, queétdihbut ã yéejabipna caá.* ⁷ Jwiit judíowã Pascuadih jeémát pínah chãjnit, nihat paáát pínahdih jwĩih muumánt yohnit, paacánni pandihjeh jwĩpĩ chãjna caá. Diosdih jwĩpĩ mao wãhni oveja wúuh pah, Dios ã enechah, yéejat wihcannit jwĩ jumat pínah niijná, Jesucristo jwiítdih át wun wúhup tají. Pánihna, paáát pínahdih jwĩ yohat pah yeebdihbut nihat ñi yéejatdih, ñi cátih jumni yéejat cádahíhcannidihbut yohat caá náahap. Pánih yohna, paacánni pan dée, Dios ã enechah, yéejat wihcannit ñi jumbipna caá.* ⁸ Pánihna, táí wēninit, biíc dih jumat túut niijná, nihat yeejép chãjatdih, yeejép jenah joyátdihbut cádahnit, yoobóp dih jenah

* 5:6 Gá 5.9 * 5:7 Ex 12.5

joinít, jwiít dih túi chãjat caá náahap.*

⁹ Wã jwíih daác wahní núdih wã niijátji pah mantih, buu wã jwáub niij daácna caá, ñi túi beh joyát pínah niijná. “Í áa nihcannitjĩh yeejép chãjnit biíc dih ñi jumca bojoó”, wã niij daacáp jĩ. ¹⁰ Páant niij daácna, “Jesús dih jéihcannit yeejép chãjnit”, niijná wã chãjcan be. “Jesús dih jéihcannit bií déedih en ñinahnit dih, nuumní dih, pãpnidih uúbh nit dih but”, niijná wã chãjcan be. Pánih chãjnit nihát pebhboó í jumna caá. Íjeéh jumíhcan, dedboó ñi jweyát pínah áta wihcan taga. ¹¹ Obohjeéhtih, nin pah niijná wã chãjap be: “ ‘Weém Jesús íh caá’, niijná yuhna, nin pah chãjnit biíc dih ñi jumca bojoó: í áa nihcannitjĩh yeejép chãjnit, en ñinahnit, pãpnidih uúbh nit, bitadih yee naóh yacnit, máihnit, nuumní í jumachah, queét biíc dih ñi jumca bojoó”, niijná wã chãjap be. Pánih chãjnit dih numah jeémpcat caá yeebdíh náahap. Queét but yeebdíh í numah jeémíhichah, ñi jepahca bojoó. ¹²⁻¹³ Weém Jesús dih jéihcannit dih í yéejat peéh wã chãjcan niít. Diosboó queét dih ã peéh chãjbipna caá. Obohjeéhtih jwíjeéh wáac jwinít Jesús íhwã í yéej chãjachah, jwiítboó queét dih peéh chãjat caá náahap, í túi túut nuumát pínah niijná. Pánihna, ñijeéh jumni tabit yeejép chãjnidih ñi yohoó. Caandíh ñijeéh biíc dih ñi jumát túutca bojoó.*

6

Jesús íhwãjeh míic ámohat

* **5:8** Ex 13.7; Dt 16.3 * **5:12-13** Dt 13.5; 17.7

1 BꞰ bih yeejép yapat doonádih joinít, bainí wã naóhbiḡna caá. Yeéb Jesúsdiḡ jéihnit jꞰmna yuhna, chénewã míic jãihnit, ¿Dépanihna, ã yoobáát pínah niijná, Jesúsdiḡ jéihcanni maáh pebhboó ñi bej? Jesúsdiḡ jéihni pebhna ñi bejechah, yeebdíh ã táí yoobáát pínah niijná, Dios caánboodíh ãta teo wáac taga. 2-3 Nindih ñi táí náhninaá: Jwí Maáh Jesús ã jwáub dei júúwúchah, yéejnitdiḡ caán biícdiḡ jwiít áihwãboó jwí wutḡbiḡna caá. Ángelwãdihbut jwí wutḡbiḡna caá. Nin baácboó jwí jꞰm jwuhuchah, ¿Dépanihna, bainí míic jãihñat ã jꞰmuhah yuhna, yeéb Jesúhwãjeh ñi jéih yoobácan? 4 Queét maátadiḡ wēi encan yuhna, ¿Dépanihna, niḡat yeéb Jesúhwã míic jãihnit, ï yoobáát pínah niijná, queétdihjeh naáwãdih ñipí bej? 5 Ñi tíicat pínah niijná, nindih wã naóhna caá: “Jwiít táí jéihnit caá”, niij jenah joiná yuhna, míic jãihnitdiḡ naóh yoobáni pínah ñijeéh ã wiḡcat pah ñi jꞰmna caá. 6 Jesúhwã míicjeh míic jãihnit, Jesúsdiḡ jéihcannit maáta pebhna naáwãdih bejna, Jesúsdiḡ jepahcannitbut ï joyóchah, ñipí naóh yacna caá. ¿Pániḡ chãjna, ñi tíiccan niít?

7 Yeéb Jesúhwã míicjeh míic jãihnit, yeebdíh yoobáni pínah maátadiḡ ñi bid bejechah, ã táican caá. Caanná bejcanjeh, yeebjéh ñi yoobánachah, ãta táí tagaá. Obohjeéhtih, jéih míic ámohcan, “Ã jꞰmꞰ naáh”, ñi niijíchah, chah ãta táí tagaá. Bitá ï jéih chãj nꞰmúchah, yeebjéh ñi jéih yoobácaḡ, “Ã jꞰmꞰ naáh”, yeebdíh niiját caá náahap. 8 Obohjeéhtih, páant niijcánjeh, yeébboó chah yeejép ñipí chãjna caá. Bitá ï yeejép chãjatdiḡ, ï jéih chãj nꞰmátdih, biíc yoobó yeéb ñipí chãjna

caá. Yeéb Jesúíhwã míc jamna yuhna, páant ñipí chãjna caá.

⁹⁻¹⁰ Nindih ñi túi náhninaá: Det yeejép chãjnit Dios pebhboó ï bejcan niít. Yeebjéh míc yeecean-jeh, yoobópdih ñi jenah joyoó. Nin pah chãjnit, Dios pebhboó ï bejcan niít: í náah chãjnit, pãpnidih uúbhnit, ï áa nihcannitjĩh yéej chãjnit, neoná mícjeh chãjnit, yaádh mícjeh chãjnit, nuumnít, bíí déedih en ñinahnit, máihnit, bitadih yeejép doonádih táoh naóhnit, jéih chãj nuumnítbut Dios pebhboó ï bejcan niít. ¹¹ Páant ï chãjat pah biquína yeébboó ñi jamap jĩ. Obohjeéhtih, Jesucristodih ñi jepahachah, ã wun wáhnit, ñi yéejatdih át yohop taga. Pánihna, buu, Túini Espíritu ã teo wáacachah, Dioíhwã ñi jamuchah, yeebdíh yéejat jíb ã wihcan caá.

Jwĩih bácahĩh yéej chãjcat caá náahap

¹² Buu biíh yeejép yapatdih bainí wã naóhbipna caá. Biquína yeéb “Jesucristodih jepahni jamna, ‘Ma chãjca bojoó’, niiját weemdíh ã wihcan caá”, ñi niij jenah joiná yuh caá. Obohjeéhtih, jwĩ yéej chãjachah, ã túican caá. Biíh jwĩ chãjachah, túini jamna yuhna, jwĩih bácahdih, jwĩ jenah joyátdih yéejana, jwiítidih ã teo wáaccan caá. Biquí láana, páant chãjatdih cádahíhna yuhna, jwĩ jéih cádahcan caá. Páant chãjcat caá jwiítidih náahap.* ¹³ “Jwĩih wudah jeémp yacat pínah caá”, niijnít, nuugúp tubuchah, jwĩpí jeémpna caá. Páant jwĩ chãjachah, ã túina caá. Nin baácboó jam jwuhna, bid jeémpna, jwĩ túi jamna caá. Obohjeéhtih, Dios pebhboó jwĩ jamuchah, bid jeémát ã wihcan niít. Biquína “Jwĩih

* **6:12** 1Co 10.23

bácah yaáhdih metat pínah caá”, ñi niíj jengah joiná yuh caá. Obohjeéhtih, pánihcan caá. Dios jwíih bácahdih chājna, caandíh jwí teo wūhat pínah ni-ijná, át chājap tajī. Caanjéh caá jwí Maáh. ¹⁴ Dios Jesucristodih boo pud jūwát túutnit, jwiít dihbut biíc yoobó ã wēpatjīh ã boo pud jūwát túutbipna caá.

¹⁵⁻¹⁶ Nindihbut ñi túi náhninaá: Jwiít Jesúihwā jumna, caán biíc dih biíc bácah dée jwí jumna caá. Génesisboó Dios nin pah át niíj daacát túutup tajī: “Newé yadjīh biíc bácah dée ĩ jum b ipna caá”, át niíj daacát túutup tajī.* Caandíh jéihnit, nin pahbut yeebdíh túi náhniat caá náahap: Ded newé yadjeéh ã jumchah, queét biíc bácah dée ĩ jumna caá. Pánihna, deoh nah jumnih wilijeéh ñi jumchah, mijeéh biíc bácah dée ñi jumna caá. Mi jengah joyát pahjeh, yeebút ñi jengah joibípna caá. ¿Dépanihna yeéb Jesúihwā, ájeéh biíc bácah dée jumna yuhna, yeejép wilijeéh biíc bácah dée ñi jumíh? Páant chājat yeejép caá. ¹⁷ Obohjeéhtih yeébbóó Jesúihwā jumnit, ájeéh biíc bácah dée jumna, Túini Espíritu ñíih caolihboó ã jumchah, caán ã jengah joyát pahjeh yeebút ñi jengah joiná caá.

¹⁸ Yeebdíh ñi áa nihcannitjīh yeejép chājcat caá náahap. Pánih yéj chājnit nihna, chah jwíih bácahdih, jwí jengah joyátdihbut jwí yéejana caá. Páant jwí chājat túttimah, jwiít dih túut nūmát chah ã buona caá. Dedé biíh jwí yéj chājachah yuhna, túut nūmát nūmp ã buona caá. ¹⁹⁻²⁰ Nindih ñi túi náhninaá: Jwíih caolihboó ã jummat pínah niijná, Dios jwiít dih Túini Espíritudih át wahap jī. Páant

* **6:15-16** Gn 2.24

ã wahachah, jwiítboó ãih m̄m̄ pánihni caá jwĩ jum̄p.* Dios Jesucristodih wah deyanit, jwiít dih ã w̄n w̄hat pínah niijná, jwiít dih ã jíib chãjap jĩ, ãihwã jwĩ jum̄at pínah niijná. Pánih ãihwã jum̄na, caán jwĩ maáh ã jum̄achah, jwĩ weñat pínahdih jenah joicánjeh, ã weñat pínahdihjeh chãjat caá náahap.

7

Téihya chéwat

¹ B̄m̄ weemdíh ñi w̄bh joí daacátjidih wã jepah-bipna caá. Nin pah ñit niij w̄bh joyóp tajĩ: “¿Jwiít Jesús dih jéihnit jwĩ áa jum̄achah, ã táimi niít?” ñit niij daacáp tajĩ. Páant ñi niij daacátjidih ennit, nin pah wã jepahna caá: Yeéb áa wihcannit ñi jum̄achah, ã túina caá. ² Obohjeéhtih, páant ñi jum̄achah, íí náah chãjat ã tobohna caá. Pánihna, yeebdíh áa jum̄at caá náahap. ³⁻⁴ Páant ñi áa jum̄achah, yaádíh bácah miíh pínahjeh nihcan caá. Mijeéh bóoíh pínah caá. Pánihna, mi áa mijeéh ã jum̄íhichah, caántdih jepahat caá náahap. Biíc yoobó newéih bácah ãih pínahjeh nihcan caá. ãjeéh bóliíh pínah caá. Pánihna, yad ãjeéh mi jum̄íhichah, caandíhbut jepahat caá náahap. Pánih chãjna, bitadih ñi bidcan niít. ⁵ “Diosdih túi w̄bát túut niijná, biíc dih jwĩ jum̄ jw̄hca boj jíih”, ñi miíc niijíchah, ã túina caá. Obohjeéhtih, w̄bh péanit, túi biíc dih ñi jw̄w̄b jum̄w̄. T̄bit maatápdih cádahna, Satanásboó bitadih ã yéej chãjat túutachah, jéih yap yohcanjeh, ñi yéej chãjbipna caá.

* **6:19-20** 1Co 3.16; 2Co 6.16

6 Obohjeéhtih, “Ñi téihya chéweé”, niijnít, wã wutcan caá. Áa jumna, áa wihcatbut, biíc yoobó ã túina caá. Ñi í náah chãjcat pínah niijná, páant wã niij naóhna caá. 7 Obohjeéhtih, “Weem páh queét nihat áa wihcannit ï jumuchah, ãta túi tagaá”, wã niij jenah joiná caá. Biquínadih áa jumat wēpatdih Dios ã wãhna caá. Obohjeéhtih, bitadih áa wihcan yuhna, túi jumat wēpatdihbut ã wãhna caá.

8 BHH, áa wihcannitdih, éemp wannitdihbut bainí wã naóhbiipna caá. Yeéboó áa wihcannit ñi jumuchah, ã túibiipna caá. 9 Obohjeéhtih, yaddih, newédih búdí bidnit, í náah chãjcat túut niijná, ñi áa pínahdih ñi ubuú.

10-11 BHH, yeéb Jesúhwã áa jumnitboodih bainí wã naóhbiipna caá. Nin wã jenah joyátjeh nihcan caá. Dios ã wutat caá. Yaádh ï áadih ï cádahca bojo naáh. Neonábut ï weha mána yaáhdih ï yohca bojo naáh. Obohjeéhtih, míc cádahnitji, biíhdih ï áa jumca bojo naáh. Pánih míc cádahnitji queét chénat pahjeh jwúub míc ámohna, biíc dih jwúub jumnit, chah ã túibiipna caá.*

12 BHH, yeéb bitadih jwuh bainí wã naóhbiipna caá. Biquína yeéb neoná Jesús dih ñi jepahachah yuhna, ñi weha mána yaádhboó ï jepahcap jĩ. Yeéb Jesúhwã ñi jumuchah yuhna, ñijeéh ï jumíhichah, ñi yohca bojoó. 13 Biquína yeéb yaádhbut Jesús dih ñi jepahachah yuhna, ñi weha mánaboó ï jepahcap jĩ. Páant ñi jumuchah yuhna, ñijeéh ï jumíhichah, ñi cádahca bojoó. 14 Yeéb biíc bácah dée ñi jumuchah, biíc Jesús jumna, biíh Jesús nihcah yuhna, Dios yeebdih ennit, “Queét wíhwã caá”, ã niijná caá.

* 7:10-11 Mt 5.32; 19.9; Mr 10.11-12; Lc 16.18

Pánihna, Jesúsdih jepahcannit neoná ï weha mána yaádh Jesúsdih ï jepahachah, queét neonádihbut Dios ã túi chãjbipna caá. Biíc yoobó Jesúsdih jepahcannit yaádh ï weha mána Jesúsdih ï jepahachah, Dios queét yaádh dihbut ã túi chãjbipna caá. Páant ñi jumuchah, ñi wehdih ennit, “Queébtut wíhwã caá”, Dios ã niijná caá. ¹⁵ Obohjeéhtih biquína Jesúsdih jepahcannitboó ï weha mána yaádh dih, ï weha manádihbut ïpí cádahíhna caá. Pánih cádahíhna, míic maocat túut niijná, ï beje naáh. ¹⁶ Obohjeéhtih, túi biíc dih ñi jumuchah, chah ã túina caá. Yeéb Jesúsdih jéihnitboó ñi weha mána Jesúsdih ï jepahat pínah, Dios queétdih ã túi ubat pínah niijná, ñi jéih teo wáacmi nacaá. “Ï jepahbipna caá. Ï jepahcan niít”, jwí niij jéihcan caá.

¹⁷ Nin pah nihat Jesúíhwãdih wãpí naóhna caá: Jesucristodih jepahnit, ded pah ñi jumatiidih biíc yoobó ñi jumúú. Páant ñi jumati pínahdih jwí Maáh jéihnit, yeebdíh át jwejep taga. ¹⁸ Det Jesúsdih jepahnit bóodnitji jumna, ï náhni dahwaca bojo naáh. Obohjeéhtih, bóodcannit jumna, ï bóodat túutca bojo naáh. ¹⁹ Bóodnitdih, bóodcannitdihbut Dios biíc yoobó ã enna caá. ã watatdih jwiútdih jepahat caá náahap. Pánih jepahnitdihjeh ã wéi enna caá. ²⁰ Dios yeebdíh áih pínahdih ã ñío láa ded pah ñi jumati pah ñi túut numcá bojoó. ²¹ Teo wãhñit ñi jumuchah, ã túina caá. Páant ñi jumati ñi náhni dahwaca bojoó. Obohjeéhtih, ñi maáta yeebdíh watíhna, ï wata naáh. ã túimi nacaá. ²² Dios ã túi ubuchah, bitadih teo wãhñitboó jwí maáih jumna, watnit dée pah ï jumna caá. Bitadih teo wãhcannitboó Jesucristodih teo wãhñit caá.

²³ Jesúíhwã ñi jumat pínah niijná, yeéb ñi yéejat jíib ãt wun wũhup tajĩ. Pánih ãihwã jumna, ã weñat pínahdihjeh yeebdíh chãjat caá náahap. Yeebdíh bita Jesúsdih ĩ cádahat túutuchah, queétdih ñi joyáh bojoó. ²⁴ Pánihna, wã úudwã panihnitá, Jesúsdih jwíih jepahnit, yeéb nihat ded pah ñi jumatji bíic yoobó ñi jumúú. Páant ñi jumuchah, Dios yeebdíh wēi ennit, ã teo wáacipna caá.

²⁵ Bũũ, áa wihcannitdih ñi úúbh joyátdih wã jepahbipna caá. Ded pah queét ĩ chãjat pínahdih Dios ã wutcan caá. Obohjeéhtih, weém wã jenah joyátdihjeh wã naóhbipna caá. Dios weemdíh ã jĩgah en teo wáacachah, wã jenah joyátdih ñi túi joyóchah, ã túimi nacaá. ²⁶ Nin pah wã jenah joiná caá: Bũũ yeó jáapna Jesúíhwã tũbit yeejép ĩ yapna caá. Ñi áa jumuchah, chah ã bũobipna caá. Pánihna, áa wihcannit jumna, áa wihcanjeh jumat caá náahap. ²⁷ Obohjeéhtih, áa jumnitboó ñi áadih yohcat caá náahap. Áa wihcannitboó ñi áa pínahdih bidcat caá náahap. ²⁸ Páant wã niijíchah yuhna, ñi áa pínahdih bid jwinít, téihya chéonit, ã túina caá. Obohjeéhtih, nin yeó jáapnadih áa jumnitboodíh chah ã bũobipna caá. Ñi áa wihchah, nump yeebdíh ã bũobipna caá.

²⁹ Páant niijnít, wã úudwã panihnitá, nin pah wã naóhna caá: Jesús ã jwúub dei jũúwát pínah bahni-jeh ã jũdhna caá. Pánihna, ded pah ã weñat pínahdih búdí jenah joyát caá náahap. Ñi weha mána yaádh ĩ weñat pínahdih ñi jenah joyát chah, Jesús ã weñat pínahdih jenah joyát caá náahap. ³⁰ Jwĩ jĩgahat, jwĩ weñat, dedé pínah nihcan caá. Bíí déedih jíib chãjna yuhna, bíbohcanit pah ñi jumúú. ³¹ Pánihna,

Jesús ã wutadnih túi chãjat túut niijná, nin baácboó jumnidih búdí wēi jenah joicát caá náahap. Ded pah Jesús ã wutatboodih jwiútdih túi jenah joyát caá náahap.

³² Bíi déedih jenah joicánjeh, Dios ã weñat pínahdih ñi túi jenah joyátdih yeebdih búdí wã náah yacna caá. Áa wihcanniboó jwĩ Maáh ã weñat pínahdihjed ded pah ã chãjat pínahdih ã túi jenah joiná caá. ³³ Obohjeéhtih, áa jumniboó ãjeéh bóli mi túi weñat pínah niijná, bíi déedihjed ãpĩ jenah joiná caá. ³⁴ Pánihna, Dioíh pínahdih ã jenah joicán caá. Yaáhdihbut bíic yoobó ã jumna caá. Caánt mi áa wihcan, jwĩ Maáh ã weñat pínahdihjed ded pah mi chãjat pínahdih mi túi jenah joiná caá. Dioíh wili mi jumna caá. Obohjeéhtih, áa jumna, newé ã weñat pínahdihjed mi jenah joiná caá.

³⁵ Pánih naóhna, túi wēinit ñi jumat pínahdih yeebdih wã náah yacna caá. Diosdihjed túi oinit, ã weñat pínahdih jenah joinít, bíi déedih jenah joicánjeh, ñi túi jumat pínahdih caá wã náah yacap.

³⁶ Вѣд, bíih naáwát yeéb japatadih jwuh wã naóhbipna caá. Ñi náahnit yaádh ĩ behechah enna, “Caántdih ubnit, jwiút chénat pah jwĩ túi jambipna caá”, niij jenah joinít, ñi ubuá. Páant ñi ubuchah, yéejat nihcan niít. ³⁷ Obohjeéhtih, bíihboó “Áa wihcanni wã jumuchah, chah ã táibipna caá”, ã niij jenah joí dée caá. Páant caanjéh niij jenah joiná, bita caandih ĩ wutcah, ã jenah joyát pah chãjna, caanbút ã túi chãjna caá. ³⁸ Pánihna, ded ã áa pínahdih ubnit, ã túi chãjna caá. Obohjeéhtih, ded caántdih ubcan, chah ã túi chãjna caá.

39 Dedh áa jumnih, mi áa ã wunçah, caandih cádahcat caá náahap. Obohjeéhtih, mijeéh bóo ã wunuchah, chéwat déedih ã watachah, ded biih áa wihcannidih náahna, mi jwúb áa jumuchah, ã táina caá. Obohjeéhtih, Jesúhdihjeh mi ñíwi naáh. 40 Weémboó nin pah wã níj jenah joiná caá: “Mi jwúb áa jumcan, chah mi wëibipna caá. Túini Espíritu caá weemdih páant ã níj jenah joyát túutur be”, wã níj jenah joiná caá.

8

Pãpnidih ï wũhni déep

1 Bũũ, biih ñi úbh joí daacátjidih wã jepahbipna caá. Nin pah ñit níj úbh joyóp tají: “¿Pãpnidih ï wũhni déepdih jwiít Jesúhwã jwĩ jeéméchah, ã táimi níit? ‘Í pãpni cáacwã ï chãjnijeh caá. Dedé wëpat wihcan caá’, jwĩ níj jéihna caá”, ñit níj daacáp tají. Páant niijnít, “Jwiít chah jéihnit caá”, níj jenah joinít pah ñit daacáp tají. Páant ñi níj jenah joyát bitadih teo wáacat pínah nihcan caá. Bitadih oinit, queétdih túinijeh naáwát caá náahap. 2 Ded “Weémboó nihtdih túi jéih beedáni caá”, níj jenah joiná yahna, yoobópdih ã jéihcan caá. 3 Obohjeéhtih, ded Diosboodih jéihni, caandih oina, bitadih ã teo wáacbipna caá. Páant ã oyochah, Dios caandihbut jéihnit, “Caán wíih caá. Wã oini caá”, ã niijná caá.

4 “¿Pãpnidih ï wũhni déepdih jwĩ jeéméchah, ã táimi níit?” ñi níj daacátjidih bũũ jwũh wã jepahbipna caá. “Pãpni báadhni nihcan caá. Dios biícjeh caá báadhni”, jwĩ níj jéihna caá. 5 Bitaboó dawádih “Nin wëpni, jwiítidih teo wáacni caá”, ï níj jenah

joiná caá. Biquína widhdih, cáiwãdih, yeodíhbut páant ìpĩ níj jenah joiná caá. Bitá jeé doóbnadidh, máa nahnadidh, ñańúpwãdihbut páant ìpĩ níj jenah joiná caá. “Nin jwiítidh wêp teo wáacni caá”, ì ni-ijní, dawá ã jumna yuh caá. ⁶ Obohjeéhtih, jwiítboó nin pah jwĩ níj jéihna caá: “Dios biícjeh, caánboó jwĩ ìp caá”, jwĩ níj jéihna caá. Caán nihatdih ãt chãjap tajĩ. Jwiít cãacwãdihbut ãt chãjap tajĩ, ãihwã jumna, caandíh jwĩ weñat pínah niijná. Jwĩ Maáh Jesucristo biícjeh caá. Caandíh Dios nihatdih chãjat túatnit, jwiítidhbut ãt jummat túatup tajĩ, Diosdih jwĩ weñat pínah niijná.*

⁷ Obohjeéhtih, “Pãpni báadhcan caá”, jwĩ níj jéihyechah yuhna, bitaboó, Jesúihwã jumna yuhna, páant ì níj jéih jwuhcan caá. Jesúsdi h ì jepahat pínah jãtíh, pãpnidih “Jwiítidh wêp teo wáacni caá”, níj jenah joinít, caandíh wëina, ì wãhni déepdih ìpĩ jeémép tajĩ. Pánihna, buubut Jesúihwã jumna yuhna, pãpnidih wãhni déepdih jeémpnit, pãpnidih ì jenah joiná caá. Obohjeéhtih, yoobópdih ì túi beh joi jwuhcan caá. Páant níj jenah joinít, “Páant wã jeéméchah, yéejat jíib weemdíh ã jumnipna caá”, ì níj jenah joiná yuh caá. ⁸ Obohjeéhtih dedéidh jwĩ jeéméchah, jwĩ jeémpcahbut, Diosboó biíc yoobó jwiítidh ã enna caá. ⁹ Caán déepdih jwĩ jeéméchah, ã túyuchah yuhna, bita Jesúsdi h jáap jéihnitdih jwíta yéjea tagaá. ¹⁰ Pãpnidih ì weñat pebhna waadnít, caandíh ì wãhni déepdih bitajeéh jwĩ jeéméchah ennit, “Caánboó Jesúsdi h túi jéihni páant ã jeéméchah, weemdíhbut ã túina nacaá”, ã níj jenah joibípna caá. Obohjeéhtih, “Pãpni ã wêpna caá”, páantjeh

* **8:6** Mal 2.10; Jn 1.3; Ro 11.36; Ef 4.6; Col 1.15-17

niij jenah joinít, jwúub jeémpna, ã túi chãjcan caá. ¹¹ “Weém túi jéihni caá”, niij jenah joinít, jwĩ jeéméchah, ã túina yah caá. Obohjeéhtih, túi jéihnit jwĩ jumatdih jwĩ júutat jíib, bita Jesúihwã jwĩ úudwã panihnit, jáap jéihnitdih jwĩ yéejabipna caá. Jesús queétdih ã wun wũhuchah yahna, buudnít ã jumbipna caá. ¹² Jwĩ úudwã panihnitdih páant yéejanit, Jesucristodih caá jwĩ yéejanap.* ¹³ Pánihna, weémboó wã úudwã panihnitdih oinit, queétdih yéejacat túut niijná, pãpnidih wéinit ã wũhni déepdih wã jeémpcan niít.

9

Jesús ã naáwát túutnit ded pah ã jummat

¹ Jesús ã bohénitji biíc yoobó weembát Jesúsdi wã enep jí. Páant caandih wã enechah, weemdihbut ã naáwát túutap jí. Pánihna, ded pah wã chãjíchah, Jesúsboó ã wutuchah, ã túina caá. Weém caandih teo wũhni yeebdih ãih doonádih wã naáwáchah joinít, ñi jepahap jí.* ² ãih doonádih jepahnit jumna, bitaboó “Pablo Jesús ã naáwát túutni nihcan caá”, ã niij jenah joyóchah yahna, yeéboó weemdih ã wahatjidih ñi jéihna caá. Wã bohénachah joinít, jepahna, “Jesús ã wēpatjĩh jwiít dih ã bohénap jí”, ñi niij jéihna caá.

³ Bitaboó nin pah ãpĩ niijná caá: “Caánboó Jesús ã naáwát túutni nihcan caá”, ã niijíchah yahna, queétdih bohéna, ñi túut nuumátjidih wãpĩ naóhna caá. ⁴ Cãacwãdih jwĩ bohénachah, jeémát dih babhbatdihbut queétkoó jwiít dih wũhat caá náhap.

* **8:12** Mt 25.45 * **9:1** Hch 9.3-6; 1Co 15.8; Gá 1.11-16

⁵ Jesús úudwā, Pedrobut, nihat bita Jesús ā naáwát túutnitbut ī weha mána yaádh biícđih ī bohé jibichah, ded pah ī náahatđih ĩpĩ wūhna caá. Jwiítbut áa jumna nihna, queét yaádhđihbut jwĩ numah jibichah, jwĩ náahatđih yeebđih wūhat āta náahcan tagaá. ⁶ Nihat bohé jibnitđih ī bohénitboó dedé ī náahatđih ĩpĩ wūhna caá. Pánihna, weém Bernabéjĩh jwĩ bohénachah, biíh tewatđih jwĩ teocat pínah niijná, jwiít chénat pahđih jwĩ náahatđih yeebđih wūhat caá náahap. ⁷ Soldadowā queétjeh ī náahatđih ĩpĩ jíb chājcan caá. Ĩ maátaboó queétđih ĩpĩ wūhna caá. Iguíh momnitboó ĩih iguíh quehechah, ĩpĩ jeémpna caá. Nihat ovejawāđih en daonítboó ĩih ovejawāđih ĩpĩ mao jeémpna caá. ⁸⁻⁹ Páant wā niiját jwiít cāacwā jwĩ jenah joyátjeh nihcan caá. Moisésji nin pah āt niúj daacáp tajĩ: “Momo jiwĩ trigo tíbnadĩh ā caóh chũñuchah, āih jacđih ñi chéoca bojoó, tíbnadĩh jeémíhna, ā jeémát pínah niijná”, āt niúj daacáp tajĩ.* ¿Páant ā niúj daacát túutna, momo jiwidĩhjih níit Dios āt jenah joijíp?*

¹⁰ Nihcan caá. Jwiít bohé jibnitboodĩh āt jenah joyóp tajĩ, cāacwāđih jwĩ bohénachah, jwiítđih ī túi en dawát pínah niijná. Wápchidĩh teonit, jeémátđih ĩpĩ bidna caá. ¹¹ Jwiítbut momnit dée, yeebđih Jesúih doonáđih jwĩ túi bohénap jĩ. Páant jwĩ chājachah, jwĩ náahatđih yeebđih wūhat āt náahap ta yuh jĩ.* ¹² Pánihna, bita bohénitđih ñipĩ wūhat pah, jwiítđihbut wūhat caá náahap.

Obohjeéhtih, páant wūhat yeebđih ā náahachah yuhna, ñi wūhcah ennit, jwiítboó jwĩ úubh tac

* 9:8-9 Dt 25.4 * 9:8-9 1Ti 5.18 * 9:11 Ro 15.27

bũugácap jĩ. Pánih wúbhcanjeh, búdí jwĩpĩ tewep jĩ. Jwĩ wúbúchah, nin pah ñita niúj jenah joi tágaá: “Pablowã bíí déedih náahnitjeh, ĩ bohéna caá”, niúj jenah joinít, jwĩ bohénachah, ñita joíhcan tagaá. Pánihna, yeebdíh bohéna, ded pah jwĩ náahatdih jwĩpĩ wúbhcap jĩ. ¹³ Obohjeéhtih, nindih ñi túi náhninaá: Dioíh mũuná jũibínit, jwiít judíowã sacerdotewãdih nũñápwãdih jwĩpĩ wũhna caá, Diosdih ĩ cáo wũhat pínah niijná. Dios queét sacerdotewãdih, bita caánboó teonitdihbut ĩ cáo jũdhni déepdih át jeémát túutũp tajĩ.* ¹⁴ Pánihna, bíic yoobó jwĩ Maáh Jesucristo jwiít ãih doonádih naóhntdih jwĩ bohénitdih át en dawát túutũp tajĩ.* ¹⁵ Páant ã wũtũchah yũhna, weémboó yeebdíh wãpĩ wúbhcap jĩ. Bũũbut páant niúj daácna yũhna, “Weemdíh ñi teo wáacá”, niijná wã chãjcan caá. Weém nũugúp wũnna yũhna, wãta wúbhcan tagaá. Wã wúbúchah joinít, ñi wũhachah, “Weém jũib wihcanni Jesúih túini doonádih wãpĩ bohéna caá”, wãta jéih niijcán tagaá.

¹⁶ “Jesúih túini doonádih wã bohéat jũib, Dios ã enechah, weém chah túini caá”, wãpĩ niúj jenah joicán caá. Obohjeéhtih, Dios weemdíh ã bohéat túutatdih chãjcan, tũbit wãta jĩgah tagaá.* ¹⁷ Wã náahat pahjeh ãih doonádih wã bohéna, wã bohénitboó weemdíh ĩ jũib chãjat pínahdih wãta bid tagaá. Obohjeéhtih, wã bohéihichah, wã bohéihcah yũhna, bíic yoobó ãih doonádih weemdíh bohéat caá náahap. ã wũtũchah joinít, ãih túini doonádih wãpĩ bohéna caá. Pánih jepahnit, weemdíh ã

* **9:13** Dt 18.1 * **9:14** Mt 10.10; Lc 10.7 * **9:16** Jer 20.9; Am 3.8

wāhni tewatjeh ã j̄m̄achah, wā bohéat j̄ib wāp̄i bidcan caá. ¹⁸ Pánihna, j̄ib bidcanjeh bohéna, búdí wā wēina caá. Yeebdíh bohénitdih en dawát ã náahachah yuhna, weémboó wāp̄i w̄bhcan caá.

¹⁹ Páant wā bohénachah, cāacwā j̄ib wāhcan, weemdíh ã j̄ih w̄tcan caá. Bitá ã weñat pínahdih chājcan, Dios ded pah ã bohéat t̄tat pahjeh wāp̄i bohéna caá. Obohjeéhtih, pánih chājna yuhna, bita ded pah ã j̄matdih ennit, biíc yoobó wāp̄i j̄m̄na caá, weemdíh wēi ennit, túini doonádih wā naáwáchah joinít, ã jepahat pínah niijná. ²⁰ Pánih chājna, wā w̄dwā panihnitá, bita judíowādh Jesúsíh doonádih bohénit, ded pah ã chājat biíc yoobó weembút wāp̄i chājna caá, wā naáwáchah wēi joinít, Jesúsíh ã jepahat pínah niijná. “Nihat jwiít judíowā jw̄i n̄owā ã w̄tatdih wā jepahcah yuhna, Dios weemdíh ã túi enna caá”, wā níj jéihna yuhna, queétdih bohénit, jw̄i n̄owā ã w̄tatdih wāp̄i jepahna caá. ²¹ Bitá judíowā nihcannit Moisés ã w̄tatjidih jéihcannitdih bohéna, ded pah ã j̄mat pah biíc yoobó wāp̄i j̄m̄na caá, wā bohénachah wēi joinít, ã jepahat pínah niijná. Pánih j̄m̄na yuhna, Dios ã w̄tatdih wāp̄i yap yohcan caá. Ded pah Jesucristo weemdíh ã w̄tuchah, caandíhbut wāp̄i jepahna caá. ²² Jáap jéihnitboodíh bohéna, “Weém Jesúsíh chah jéihni caá”, wāp̄i niijcán caá. Queétkoó túi beh joi jwáhcan, “Nin pah chājnit, wāta yéej chāj tagaá”, níj jenah joinít, ã chājcatdih weembút wāp̄i chājcan caá, queétdih teo wáacat t̄tat niijná. Pánihna, nihat ã j̄mat biíc yoobó wāp̄i j̄m̄na caá, wā bohéatdih ã túi jepahachah, Dios queétdih ã túi w̄bat pínah niijná. ²³ Jesúsíh túini doonádih nihat cāacwā ã joyát pínah niijná, páant

wāpī chājna caá. Pánih chājna, queét ĩ jepahachah, Dios pebhboó jumna, jwiít biíc dih jwĩ túi wēibipna caá.

²⁴ Dios pebhboó juibínit, chah túini ã wūhat pínahdih bídnit, nin baácboó jum jwahna, ded pah ã wutatdih ñi túi jepahaá. Nin pah ã jumna caá: Căacwă ñáonit, nihat ĩ ñáwachah yahna, chah wēpép ñáonidihjeh wēinit, túinidih ĩpĩ wūhna caá. Pánihna, chah wēpép ñáoni dée jwiítbut Dios ã wutatdih túi chājnit, ã pebhboó jwĩ juibínachah, jwiít dih wēinit, túinidih ã wūhbipna caá. Pánih wēpép ñáoni dée, Dios ã weñat pínahdih túi chājat caá náahap. ²⁵ Nin pahbut ã jumna caá: Ñáonitboó ĩih bácahdih ĩpĩ wēpana caá. Pánih wēpana, ĩih bácahdih yéjaat pínahdih ĩpĩ chājcan caá. Căacwă queétdih wēinit, núojĩh péeb waoni júdudih ĩ wūhatdih ĩpĩ bidna caá. Obohjeéhtih, pánih wūhni júdu waícanjeh āpĩ wunah bejna caá. Pánihat dée jwiítboó jwĩih caolihdih yéjaíhcan, Diosdih wūbhnit, ã naáwát dihbut jwĩpĩ jenah joiná caá. Pánih chājnit, ã pebhboó jwĩ juibínachah, túinidih jwiít dih ã wūhbipna caá. Caán ã wūhni pínahboó ã buudcán niít. ²⁶ Weémboó yoobóp dihjeh ñáoni dée, Dios ã weñat pínahdihjeh chājat túut niijná, caandih wāpĩ túi jenah joiná caá. Míc mao tíohnit yoobóp dih ĩ mao chūúát pah, weembút Jesús ã wutatdih túi chājat túut niijná, Diosdih wā túi jenah joiná caá. ²⁷ Ñáonit, míc mao tíohnit ĩih bácahdih yéjacat túut niijná, ĩ náahatdihjeh ĩpĩ chājcan caá. Páant ĩ chājat pah, weembút wĩih caolihdih yéjacat túut niijná, wā náahatdih chājcan, Dios ã weñat pínahdihjeh wāpĩ chājna caá. Pánih chājnit, Dios

pehbboó wã juibínachah, “Bitadiah ma bohénachah yuhna, dedé jíb wãhat pínah meemdíh ã wihcan caá”, weemdíh ã niijcán níit.

10

Egipto baácmant jãóhniit ded pah ã yapatji

¹⁻² Dios pehbboó juibínit, jwiít dih wëinit, túinidih ã wãhat pínahdih jwiít nihat jwí bidna caá. Pánih bidnit, jwiít judíowã jwí n̄owã Egipto baácmant jãóhna, ded pah ã yapatjidih jwiít dih túi náhníat caá náahap. Queét nihat Moisésjeéh ã bejechah, Diosboó queétdih wapna, mah pōh panihniijh át waáwáp wut jī.* M̄j Mac D̄unidih jōpanit, queét nihat Moisésjeéh Dios át cháuh bejat túutap wut jī.* Pánih jamna, Moisésdih ít túi péenap wut jī.
³ Tútchi wihcapboó jamnit, Dios ã wãhni jeémátdih nihat ip̄i jeémép wut jī.* ⁴ M̄j wihcah, mah ã bac jãúwát pínah niijná, Dios Moisésdih búdí jee dáhdih át mawat túutap wut jī. Páant ã chãjachah, ã wãhni mahdih queét nihat ít babhbap wut jī. Jee dáhmant ã babhni mah ã bac jãúwát dée, Jesucristobut Túini Espíritudih át wũhup wut jī. Ì jéih encah yuhna, Jesús ãjeéh ã jib bejechah, ã wãhni Túini Espiritu queétdih át teo wáacáp wut jī.*
⁵ Obohjeéhtih, queétdih Dios búdí ã teo wáacachah yuhna, biquínajeh caandíh ít jepahap wut jī. Bita dawá caandíh jepahcannitdih wëi encan, Dios queétdih át peéh chãjap wut jī. Pánihna, nihat

* **10:1-2** Ex 13.21-22 * **10:1-2** Ex 14.22-29 * **10:3** Ex 16.35

* **10:4** Ex 17.6; Nm 20.11

Egipto baácmant jũóhnit, tútchi wihcapboó jib be-
jna, páantjeh ít wun beedép wut jĩ.*

⁶ Páant queét nihat í yapatdih náhnina, biíc
yoobó yeejép í chãjat pah jwĩ chãjca boj jũh.* ⁷ Dios
ã daacát túutni tólih, Éxodo í niijnídih, nin pah át
niij daacát túutup tajĩ: “Queét cãacwã í pãpnidih
wẽinit, biíc dih wẽi jeémp babh máihna ít chãjap wut
jĩ”, át niijíp tajĩ.* Páant í yéej chãjat pah, jwiít dih
chãjcat caá náahap. ⁸ Biíh láa biquína yaádh metnit,
íí náah ít chãjap wut jĩ. Páant í íí náah chãjat peéh
biíc yeó jáapdihjeh veintitrés mil queétdih Dios át
mawap wut jĩ.* Páant í chãjat pah, jwiít dih chãjcat
caá náahap. ⁹ Biíh láa, biquína nin pah Moisésdih ít
niij jũihñup wut jĩ: “¿Dépanih tibeé jwiít dih Egipto
baácmant ma ub jũóh? Nin tútchi wihcapboó jwĩ
yabh jibna caá. Dios jwiít dih ã táí en daocán caá”,
ít niijíp wut jĩ. Páant niijnít, Diosdih tac buugána,
caandíh ít íjanap wut jĩ. Páant í yéejat peéh, Dios
maiwãdih át wahap wut jĩ, queétdih í chãác mawat
pínah niijná.* Páant í yapatdih jenah joinít, í chãjat
pah jwiít dih chãjcat caá náahap. ¹⁰ Biíh láa, biquína
nin pah ít míic niijíp wut jĩ: “¿Dépanih tigaá Dios
Moiséswãdihjeh jwĩ maáta át chãj? Jwiít nihat biíc
yoobó túinit jwĩ jumna caá”, míic niijnít, Diosdih
ít jũihñup wut jĩ. Páant í jũihñat peéh mawat pínah
niijná, Dios ãih ángeldih át wahap wut jĩ.* Páant í
chãjat pah, jwiít dih chãjcat caá náahap.

¹¹ Páant queét í yapatji jwiít péeni yeó jáapna
jumnitdih ã jéihyana caá. Í yapatjidih Moisés

* **10:5** Nm 14.29-30 * **10:6** Nm 11.4 * **10:7** Ex 32.6 * **10:8**
Nm 25.1-18 * **10:9** Nm 21.5-6 * **10:10** Nm 16.41-49

ã daacátjidih ennit, túi jenah joinít, biíc yoobó jwiít dih chãjcat caá náahap. ¹² “Weémboó Jesús dih wã chah túi jenah joiná caá. Dedé yéej chãjat jenah joyát weemdíh ã jũúwáchah yuhna, wã túi jéih yap yohna caá”, niíj jenah joiná, ñi túi chãja chaáh. Páant niíj jenah joiná yuhna, jon jãtíh moón ã chãjat pah, ñi jwúub yéej chãjmi nacaá. ¹³ Jwiít nihat biquí láana yeejép chãjat jwí jenah joiná caá. Páant jwí yéej chãjíchah yuhna, jwí yéej chãjcat pínah niijná, Dios jwiít dih ãpí teo wáacna caá. Pánih teo wáacna, namá déedih jwiít dih ãpí júutna caá, jwí yap yohat pínah niijná. Pánihna, ded pah jwí buujácat dih jéihnit, chah yeejépdih jãhnit, jwiít dih ãpí teo wáacna caá.

Pãpnidih wëicat

¹⁴ Wã chéenwã, nindih ñi túi joyoó: Bitá “Jwíh dios, jwiít dih teo wáacni caá”, ã niíj pãpnidih ã weñepboó bejcanjeh, queét ã chãjat biíc yoobó yeebbát ñi chãjca bojoó. ¹⁵ Yeéb túi jéihnit jumna, ded pah ñi chãjat pínah dih jéihyat túut niijná, nin wã naáwát dih yeebjéh ñi túi jenah joyoó: ¹⁶ Míic wáac jwinít, Jesús íh meép panihni iguíh macdih babhnit, áih bácah panihni pandihbut biíc dih jwí jeémát dih bainí yeebdíh wã naóhbiipna caá. Pánih babh, jeémpna, ã wun wãhat dih jenah joinít, “Túina caá”, jwí pí niijná caá. “Jwiít dih wun wãhna, jwiít ájeéh túi biíc dih jwí jumuchah, ã wëpat jwiít dihbut ã wãhna caá”, jwí niíj jéihna caá.* ¹⁷ “Jwí jeémpni pan biíc dahjeh ã jummat pah, jwiít nihat biíc dih

* **10:16** Mt 26.26-28; Mr 14.22-24; Lc 22.19-20

biíc bácah dée jwĩ jumna caá”, niij jéihnit, caán pan dahdih biíc dih jwĩpĩ jeémpna caá.

¹⁸ Jwiít judíowā ded pah jwĩ chājatdih ñi jenah joyoó: Dioíh munná bejnit, nuñúpdih mao cáo wāhnit, Diosdih jwĩpĩ wēina caá. Caandíh jwĩ wāhat túttimah, caán déepdih jeémpna, Diosjĩh biícwā jwĩ jumna caá. Bitabut pāpnidih ĩ wāhnijidih jeémpna, queébtut caanjĩh biícwā ĩ jumna caá.*

¹⁹ Páant niijnít, “Jwĩih dios caá”, niij pāpni, caandíh ĩ wāhniabut “Dedé wēpat ā jumna caá”, wā niijcán caá. ²⁰ Obohjeéhtih, dedé wēpat ā wihcah yuhna, bita caandíh jeémát dih wāhna, Diosdih jenah joicánjeh, nemépwāboodíhjenah jenah joinít, ĩ wāhna caá. Pánih wāh péanit, jwūub jeémpna, nemépwā biíc dih ĩ jumna caá. Yeébbodíh nemépwā biíc dih ñi jummatdih wā náah yaccan caá.* ²¹ Nemépwā biíc dih jumna, Dios biíc dih ñi jéih jumcan caá. Dios biíc dih túi jummat túut niijná, nemépwā biíc dih jumcat caá náahap. Pánihna, nemépwā dih ĩ wāhni jeémát dih ñi jeémpca bojoó. Caandíh wāhni babhbatdihbut ñi babhca bojoó. Jesucristo ā wun wāhatdih jenah joinít, caán biíc dih jummat túut niijná, āih meép panihni iguáh macdih babhna, āih bácah panihni pan dahdih jeémát caá náahap.* ²² Pāpnidih wāhniiji jeémát dih, Jesús ā wunatdih jenah joiní jeémát dihbut jeémpna, jwĩ Maáhdih ñi íjana caá. ¿Yeéboó Diosdih chah wēpnit niít ñi jumap? ¿Ñi yéejat ā peéh chājatdih ñi jéih jweimí naniít? Nihcan caá. Pánihna, ā íjatdih úumnit, nemépwā dih ĩ wāhnijidih ñi jeémp, babhca bojoó.*

* **10:18** Lv 7.6 * **10:20** Dt 32.17 * **10:21** 2Co 6.15-16 * **10:22** Ex 20.5; Dt 32.21

Bitadih oinit, teo wáacat

²³ Biquína yeéb nin pah ñi niíj jenah joiná caá: “Jesucristodih jepahni jumna, ‘Ma chãjca bojoó’, niiját weemdih ã wihcan caá. Weemdih yéej chãjatjeh ã náahcan caá”, ñi niíj jenah joiná caá. Obohjeéhtih, biíh jwĩ chãjachah, túini jumna yuhna, jwiít dihjeh, bitadihbüt ã teo wáaccan caá.*

²⁴ Pánihna, jwĩ weñat pínahdihjeh chãjcan, bitadih jwĩ teo wáacat pínahdih chãjat caá náahap.

²⁵ Déepdih jíib chãjatboó jíib chãjadih bejna, “¿Pãpnidih ì wũhni niít? ¿Wã jeéméchah, ã túimi niít?” niíj wúbh joicánjeh, jíib chãjnit, ñi jeémé.

²⁶ Jwĩ íip Dios nihatdih ã chãjni, nihat ãih caá. Dedé jwĩ jeémát pínahdihbüt chãjnit, jwiít dih ã wũhna caá. Pánihna, ã wũhndih jwĩ jeéméchah, ã túina caá.*

²⁷ Jesús dih jéihcanni yeebdih ã numah jeéméchah, bejnit, dedé ã wũhuchah, “¿Nin pãpnidih ì wũhni niít?” niíj wúbh joicánjeh, ñi jeémé. ²⁸ Obohjeéhtih, Jesús dih jáap jéihnibüt jumna, “Nin déep pãpnidih ì wũhni caá”, yeebdih ã niijíchah joinít, caandih ñi jeémpca bojoó. ²⁹ “Wã jeéméchah, ã túina caá”, niíj jéihna yuhna, jeémpnit, jwĩ Maáhdih jáap jéihniboodih yeéb ñita yéeja tagaá. Obohjeéhtih, “Ñi jeémpca bojoó”, wã niijíchah joinít, nin pah weemdih ñita niíj wúbh joi tágaá. “Caandih wã jeéméchah ã túyatdih jéihna yuhna, ¿Dépanihna jáap jéihni ã jenah joyát pah weemdih chãjat náah?*

³⁰ Dedédih jeémpnit, ‘Ma wũhat túina caá, Paá’, wãpĩ niijná caá. Páant wã niijíchah

* **10:23** 1Co 6.12 * **10:26** Sal 24.1; 50.12; 89.11 * **10:29** 1Co 8.7-12

yuhna, ¿Dépanihna, ‘Caandíh jeémpnit, ma yéej chājna caá’, weemdíh ma niíj?’ ñita niij tágaá.
 31 Páant niíj naóhna, nin pah niijná caá wã chājap: Jwiít Jesúíhwādih túi chājat caá náahap, bita jwiít dih ennit, queébtut Diosdih ñ weñat pínah niijná. Pánihna, jeémp, babh, dedédih chājna, bita Diosdih ñ wēi naáwát pínah niijná, túi chājat caá náahap. 32 Judíowã, judíowã nihcannit, Jesúíhwādihbut yeejép ñi chāj jútca bojoó.
 33 Weéamboó dedé wã chājíhna, nihat cāacwã ñ túi jumathdih jenah joinít, wãpí chājna caá. Pánihna, Jesús dih ñ jepahachah, Dios queétdih ñ túi ubat pínahdih bádí náah yacna, wã túi jumathdih jenah joicánjeh, bita ñ túi jumathdih wãpí jenah joiná caá.

11

1 Weém Jesucristo ded pah ñ chājatjdih jenah joinít, biíc yoobó wãpí chājna caá. Páant wã chājat pah, yeebbát ded pah wã chājatdih ennit, biíc yoobó ñi chājaá.*

Míc wáacnit, ded pah ñ chājat pínah

2 Ded pah wã chājatjdih náhninit, yeéb biíc yoobó ñi túi chājna caá. Jesúíh doonádih jwí bohénachah joinít, páantjeh ñi túi jepahna caá. Páant ñi chājachah, yeebdíh wã wēina caá.* 3 Buh biíhdih wã naóhbiipna caá, yeéb Jesúíhwã míc wáacnit, ded pah ñi chājatdih ñi túi jéihyat pínah niijná. Nindih ñi náhninaá: Jwí íip Dios Jesucristo ñ maáh caá. Jesús neoná ñ maáh caá. Neoná ñ weha mána yaádh

* 11:1 1Co 4.16; Fil 3.17 * 11:2 2Ts 2.15

ĩ maáh caá. ⁴ Nĩih baácdih moón biĩhdih jepahat jũutna, ñĩih waojĩh yégueh chóojĩh ñipĩ cáagna caá. Pánihna, Jesúih neonáboó ʘúbhnit, Dios naáwátdih naóh yapanitbut jih cáagna, “Biĩh caá wã maáh. Jesús nihcan caá”, niiját jũutat dée chãjnit, jwĩ Maáh Jesucristodih yeejép ĩ chãjna caá. ⁵ Yaádhboó ʘúbhna, Dios naáwátdih naóh yapanit, jih cáagcan, “Wãjeéh bóodih wã jepahcan niit”, niiját jũutat dée chãjnit, ĩ weha mánadih yeejép ĩ chãjna caá. Mi áa nihcanniyeéh yeejép chãjnih wili, nihat miĩh waó yoóc boj yohnih dée mi jumna caá. ⁶ Yaádhboó ĩih waojĩh yégueh chóojĩh cáaguĩhcan, waó yoóc boj beedánih ĩ jumna naáh. Obohjeéhtih, boj beedáátdih tíicnit, ĩ jih cáaga naáh. ⁷ Diosdih ʘúbhna, neonáboó Dios ã nihat panihni jumna, ĩih wao dáhjih cáagcat caá náahap. Páant ĩ cáagcan, “Diosjeh caá wã maáh. Caánboó chah túini caá”, ĩ niiját jũutna caá. Yaádhboó cáagnit, “Wãjeéh bóo túini caá. Caandih wã wẽi jepahna caá”, ĩ niiját jũutna caá.* ⁸ Dios cãacwãdih jwĩih chãjna, newédih át jwĩih chãjap wut jĩ. Túttimah áih páwájĩh yaddih át chãjap wut jĩ. ⁹ Newédih chãjnit, yaddih teo wáacni pínah nihcan wut jĩ. Obohjeéhtih, yadboodih newédih teo wáacnih pínah át chãjap wut jĩ. Páant tigaá neoná maáh panihnit ĩ jumna caá.* ¹⁰ Yaáhdih wao dáh jih cáagat caá náahap, ĩ weha mánadih ĩ jepahat jũutat túut niijná, Dioih ángelwã ĩ wẽi enat pínah but niijná. ¹¹ Obohjeéhtih, neoná ĩ weha mána yaádh ĩ maáh ĩ jumnachah yahna, Jesúihwã jumna, Dios queét chénat pahdih biíc yoobó ã enna caá. Pánihna, queétdih míic teo wáacat caá náahap.

* 11:7 Gn 1.26-27 * 11:9 Gn 2.18-23

¹² Dios newédih jwíh chājna, ãih páwájih yaddih ãt chājap wut jĩ. Buu yaádh caá neoná pínahdih ĩ weh jumna caá. Obohjeéhtih, Dios caá nihardih ã chājap.

¹³ Míc wáacnit, ded pah ñi jumat pínahdih túi jéihyat túut niijná, yeebjéh ñi jenah joyoó. Níih tútchinadih moón bitadih ĩ jepahat júutíhna, ñih waojéh yégueh chóojih ĩpĩ cáagna caá. Pánihna, yaádhboó Diosdih wúbhñit, ĩ weha mánadih ĩ jepahat júutna, queétdih waojéh cáagat caá náahap. ¹⁴ Nĩ cātíh newé waó yoóc maátñi ã d̥wúchah ennit, “¿Caánboó yad wili pah waó yoóc d̥oná, ã tíccan niit?” ñipĩ niij jenah joiná caá. ¹⁵ Obohjeéhtih, yadboó waó yoóc maátñi mi d̥wúchah ennit, “Míih waó yoóc maátñi d̥oná, mi túi jíghna caá”, ñipĩ niij jenah joiná caá. Pánihna, miíh waó yoóc maátñi d̥onít, mijeéh bóodih jepahat júutna caá mi chājap. ¹⁶ Páant wã naáwátdih ded biíhboó mácah ã naáwíhichah, nin pahjeh wã jepahna caá: Nihat jwiit yeebdíh bohénit wã naáwátdih biíc yoobó jwĩpĩ bohéna caá. Nihat nin baácnadih moón Dioíhwābūt Diosdih wēinit, biíc yoobó ĩpĩ chājna caá.

Jesús ã wutni jeémátdih ĩ túi chājcat

¹⁷ Jesús ã wutni jeémátdih buu bainí wã naóhbiḡna caá. Míc wáacnit, Jesús ã wutni jeémátdih ded pah ñi jeémát doonádh joinít, yeebdíh wã wēican caá. Jesús ã naáwátdih biíc yoobó chājcan, caandíh ñi chah jenah joyát pínahdih míc teo wáaccanjeh, ñi míc yéejana caá. ¹⁸ Pánih míc wáacnit, Jesús ã wunatdih náhninit, biícđih jeémát túut niijná yahna, ¿Dépanihna, biícđih

ñi jeémpcan? Biquína dawá bií dée bíbohnit moh yéejnit bíícdih ï jeémíhcan caá. Bitaboó ï chéenwã biíc yoobó jenah joinítjeh bíícdih ï jeémpna caá. Obohjeéhtih, biquína bitajeéh ïpí túi jeémpna caá. Pánih nihát bíícdih jeémpcan, ded pah Jesús ã bohéátdih ñi chãjcan caá. ¹⁹ Obohjeéhtih, pánih jumna, det Jesúsdihtú jephátnitdih, det Jesúsdihtú jephácnitdihbat ñi jéihna caá. Páant ñi chãjcan, ñita jéihcan tagaá. ²⁰⁻²¹ Ñi jeéméchah, bitadih páicanjeh, ñi ub jūóhni jeémátdih ñipí jeémpna caá. Páant ñi jeéméchah, biquína moh yéejnitboó bainí jeémátdihjeh bíbohnit, túi jeémp chūúhcan, nuugúp ï wunna caá. Bitaboó búdí iguúh macdih ub jūóhniht, bitadih wūhcanjeh, ï babh máihna caá. Pánih chãjna, “Jesús ã wutni jeémátdih jeémpna caá jwí chãjap”, niijná yuhna, yoobópdih ñi niijcán caá. ã wutni jeémát ã jumachah, nihát ñi ub jūóhni jeémátdih pááhnit, bíícdih ñita wēi jeémp tagaá. Pánih jeémpna, túi bíícdih áih bácah pah ñita jum taga. ²² ¡Ñi jenah joyoó bāca! ¿Dépanihna tubit nuugúp tubuchah yuhna, ñíih muúboojéh jum jwuhna, ñi jeémpcan? ¿Dépanihna bita Jesúihwã páant yeejép ñi chãj? ¿Dépanihna Jesúihwã moh yéejnitdih jīgah encanjeh ñi túica? ¿Ded pah wã niijbí? ¿Páant ñi chãjachah, yeebdíh wã wēimi naniít? Nihcan caá. Wã wēican niít.

Jesús ã wutni jeémát ded pah ã jumát

²³ Jesucristojeh nin pah weemdíh ã jéihyanap jī, ã wun wūhatdih náhninit, ded pah pandih jeémp, iguúh macdih babhniht, jwí túi jeémát pínah ni-ijná: Caandíh eníhcannit ï teoni pínah chei Jesús ã bohénitdih át numah jeémép wut jī. Pánih jeémpnit,

jwĩ Maáh Jesús pan júduh ãbnit, ²⁴ “**Nindih ma wãhat túina caá, Paá**”, niij péanit, ã bohénitdih ãt õi wũhup wut jĩ. Pánih õi wũhnit, nin pah ãt niijíp wut jĩ: “**Nin pan wĩih bácah panihni caá. Yeéb ñi yéejat jíib wã wun wũhbiþna caá. Pánihna, nindih jeémpnit, wã wun wũhatdih ñi náhninaá**”, ãt niijíp wut jĩ. ²⁵ Pánih jeémp péanit, Jesús pamapdihbut ãb, ãbhnit, nin pah queédih ãt niijíp wut jĩ: “**Nin iguĩh mac wĩih meép panihni caá. Wun wũhnit, jáap namá dée wã chãþbiþna caá, Diosjeéh ñi túi þumat pínah niijná. Wã wun wũhatdih ñi túi jenah joyóchah, Dios ñi yéejatdih ã yohþiþna caá, iiguĩþna beþnit déedih ã peþþboó ñi beþat pínah niijná. Pánihna, iguĩh macdih babhnit, weemdih ñi náhninaá**”, Jesús ã bohénitdih ãt niijíp wut jĩ.* ²⁶ Pánih pandih jeémp, iguĩh macdih babþbat þumat pah “Jesús weemdih ã wun wũhatdih wã túi jenah joiná caá”, niiját júutna caá jwĩ chãþap. Pánihna, Jesús ã jwũub dei jũúwát pínah jãtjeh páantjeh jwiit ãihwãdih pandih jeémpnit, iguĩh macdih babþbat caá náahap.

Jesús ã wutni jeémãtðih ded pah ã jeémãt pínah

²⁷ Jesucristo ã wun wũhatdih túi jenah joinít, bita Jesúihwãdih oinit, pandih jeémp, iguĩh macdih babþbat caá náahap. Ded jenah joicãnjeh jeémpnit, babhna, Jesúih bácahdih ãih meépdihbut “Dedé pínah nihcan caá”, niijnít, caandih búdí ã yéej chãþna caá. ²⁸ Ded ã jeémãt pínah jãtjeh, ã yéej chãþatdih jenah joyát caá náahap. Pánih jenah joinít, ã yéejatdih Diosdih naóh péanit, ã jeémé naáh. ²⁹ Jeémpnit, nin

* **11:25** Ex 24.6-8; Jer 31.31-34; Mt 26.27-28

pah jenah joyát caá náahap: “Nin pan Jesúh bácah panihni, nin iguúh mac áih meép panihnidih enna, wã yéejat jíib weemdíh ã wun wáhatdih wã náhnina caá”, niij jenah joí, jeémpnit, ã babhba naáh. Páant niij jenah joicán, dedé yéejatdih naóhcan, ã jeéméchah, Diosboó caandíh ã peéh chãjbipna caá. ³⁰ Jesús ã wutni jeémát dih túi jenah joicánjeh ñi jeémát jíib, dawá tubúp chũúhñit, bitabat ít wunah bejep wut jí. ³¹ Obohjeéhtih, yeebjéh ded pah ñi yéejatdih jenah joinít naáwáchah, Diosboó yeebdíh áta peéh chãjcan tagaá. ³² Pánihna, Dios buu yeebdíh peéh chãjnit, bohéna caá ã chãjap, túttimah iiguípna ñi bejcat pínah niijná.*

³³ Wã úudwã panihnítá, Jesús ã wutni jeémát dih jeémát túut niijná, míic wáacnit, nihatdih páinit, bíicdih ñi túi jeémé. ³⁴ Nuugúp tubanitboó íih muúboó jum jwuhna, í jeémp wud jum naáh. Pánihna, túinijeh ñi jeémé, Dios yeebdíh ã peéh chãjcat pínah niijná.

Ñi pebhna jwibínit, bíih ñi úúbh joí daacátjidih wã jepahbipna caá.

12

Túini Espíritu ã jéihyaat

¹ Buu Túini Espíritu ã jéihyaatnadh ñi úúbh joyát dih wã jepahbipna caá, ñi túi jéihyat pínah niijná. ² Nindih ñi náhninaá: Yeéb Jesucristodih ñi jepahat pínah jãtih, nemépwã í maáh ñi nuowãdih yeenit, ã jéih jepahcah yuhna, yeéb Corinto tútchidih moondíh pãpnitdih át úúbat túutap tají. ³ Ded Túini Espíritu ã wépatjñ naóhni, ded

* **11:32** Dt 8.5; He 12.5-11

nemépwã ï wēpatjīh naóhndihbut ñi jéihyat pínah niijná, nin pah wã niúj daácna caá: “Túini Espírítu ã wēpatjīh naóhnit, ‘Jesucristo yeejép caá’, ï niijcán niit. Obohjeéhtih, nemépwãboó ï wēpatjīh naóhnit, ‘Jesucristo Dios wãúh, jwĩ Maáh caá’, ï jéih niijcán niit”, wã niijná caá.

⁴ Túini Espírítuboó jwiit Jesúíhwãdih teo wáacna, mácah jéihyatnadih ãpĩ wãhna caá. Obohjeéhtih, jéihyatna mácah ã jumuchah yuhna, caán Túini Espírítujeh páant ãpĩ teo wáacna caá. ⁵ Ded pah bitadih jwĩ teo wáaquíhichah, mácah ã jumuchah yuhna, jwĩ Maáh Jesúskeh jwiit nihatdih ã teo wáacat túutna caá. ⁶ Bitadih mácah jwĩ teo wáacachah yuhna, Dios ã wēpatjīhkeh jwiit nihat jwĩ jéih teo wáacna caá. ⁷ Jwiit nihat Jesúíhwãdih Túini Espírítu ã wēpatjīh ãpĩ teo wáacna caá, jwiitbut bita áihwãdih jwĩ teo wáacat pínah niijná. ⁸ Biquína ã wēpatjīh, “Nin pah meemdíh chājat caá náahap”, ï niúj jéih naóh yapana caá. Bita ã wēpatjīh ded pah yapatdih, ded pah yapat pínahdihbut ï túi jéih naóh yapana caá. ⁹ Bita ã wēpatjīh, Diosdih chah jenah joinít, biíhdih ï jéih teo wáacna caá. Bitabut wannitdih teo jáhanit, ï jéih booana caá. ¹⁰ Bitabut cáacwã ï jéih chājca naáhdih ï chājna caá. Bita Dios ã naáwáchah, ï jéih naóh yapana caá. Bita ded Túini Espírítu jumnidih, ded nemép jumnidihbut ï beh enna caá. Bitabut ã wēpatjīh mácah wéheatjīh ï jéih naóhna caá. Bita mácah wéheatjīh ï naáwáchah joinít, ï jéih naóh yapana caá. ¹¹ Pánihna, nihat mácah ã jumuchah yuhna, Túini Espírítujeh ã weñat pínahdih chājnit, queét nihatdih ãpĩ teo wáacna

caá.*

Jesúhwã biíc bácah pah jwĩ jumat

¹² Jwĩih bácah biícjeh ã jumuchah yuhna, téihyana jum, quíib dahna jum, jítchana jum, moli chónabut ã jumna caá. Obohjeéhtih, dawá ã jumuchah yuhna, nihat jwĩih bácahdih jumnijeh caá. Pánihat pah, jwiít Jesúhwã dawá jumna yuhna, jwiít nihat biíc dih ãih bácah dée jwĩ jumna caá.* ¹³ Biquína judíowã, bita judíowã nihcannitbut jum, biquína teo wãhniit, bita teo wãhcannitbut jwĩ jumna caá. Obohjeéhtih, jwiít nihat mácah jwĩ jumuchah yuhna, jwiít dih teo wáacni Túini Espíritu biícjeh jumna, jwiít dih waadníit, jwiít nihat dih biíc bácah pah át chãjap taga.

¹⁴ Jwĩih bácahdih jumni biícjeh nihcan, dawá ã jumna caá. ¹⁵ Jwĩih jítcha wéheni nihna, “Caán téihya chah túini caá. Weémboó téihya nihcan, nin bácahdih jumni pínah nihcan caá”, ã niijíchah yuhna, bácahdih jumni páantjeh áta jum tagaá. ¹⁶ Jwĩih molítboó “Weém quíib dah nihcan, nin bácahdih jumni pínah nihcan caá”, ã niijíchah yuhna, bácahdih jumni páantjeh áta jum tagaá. ¹⁷ Obohjeéhtih, jwĩih bácahdih quíib dahjeh jumna, molít wihcah, ¿ded pah tigaá jwĩta jéih joí? Molítjeh jumna, wuúic íit wihcah, ¿ded pah tigaá jwĩta jéih jóí? ¹⁸ Pánihna, nihat bácah jumnidih jwĩ náahna caá. Diosboó túi jéihni jwiít dih chãjni ded pah ã náahat dih nihat jwĩih bácahdih jumni pínah dih át chãjip taga, jwĩ túi jumat pínah niijná. ¹⁹ Jwĩih bácahdih quíib dahjeh, jítchajeh, téihyajeh

* **12:11** Ro 12.6-8 * **12:12** Ro 12.4-5; Ef 4.14-16

ã jumuchah, jwĩta jéih jumcan tagaá. ²⁰ Pánihna, dawá bácahdih jumni ã jumuchah yuhna, biíc bácahjeh ã jumna caá.

²¹ Jwĩih quíib dahboó “Weém nihat jéihni caá. Dedé weemdíh judhcan caá. Pánih jumna, caán téihya ã teo wáacat pínahdih wã náahcan caá”, ã niijíchah yuhna, ã teo wáacat ã náahna caá. Jwĩih wao dáhboó “Dedé weemdíh judhcan caá. Pánih jumna, caán jíthadiah wã náahcan caá”, ã niijíchah yuhna, caandíh ã náahna caá. ²² “Wĩih bácahdih jumni túi wēpcanni caá”, jwĩ niij jenah joiníboó chah ã náahna caá. ²³ “Túí jígohcanni caá”, jwĩ niij jenah joiná, túini yéguehdih jwĩpĩ daoná caá, túí jígohat túut niijná. Tíicnit, jwĩpĩ jáhna caá, bita ĩ encat pínah niijná. ²⁴ “Bita ĩ enechah, dedé pínah nihcan caá”, jwĩ niij jenah joinídih jwĩpĩ jáhcan caá. “Wēpcanni caá. Túí jígohcanni caá. Tíic náah jumni caá”, jwĩ niij jenah joinídih chah jwĩpĩ túi en daoná caá. Páant tigaá Dios át chājap taga, ²⁵ míic jūihñat dée wihcanjeh, nihat ã túí míic teo wáacat pínah niijná. ²⁶ Pánihna, jwĩih quíib dah tubna, nihat bácah ã tubana caá. Quíib tubat ã yayáchah, nihat jwĩih bácah ã túina caá.

²⁷ Yeéb nihat Corinto tútchidih moón Jesúihwã áih bácah dée ñi jumna caá. Pánihna, jwĩih bácahdih jumni nihat ã chājat pínah mácah ã jummat pah, yeebbút Jesúih bácahdih jumnit dée, ñi chājat pínahbut mácah ã jumna caá. ²⁸ Nihat Jesúihwã biíc dih jumnit, Túini Espíritu ã wēpatjĩh mácah jéihyatnadiyah Dios át wāhup taga. Dios ã jwĩih ñíonitboó Jesús ã naáwát túutnit ĩ jumna caá. Túttimah, Dios naáwátdih naóh yapanit ĩ

jumna caá. Túttimah, ã naáwátdih bohénit ï jumna caá. Túini Espíritu ã wēpatjĩh cãacwã ï jéih chãjca naáhdih biquína ï chãjna caá. Biquínaboó wãnnitdih teo jáha úbhñit, ã wēpatjĩh ï jéih booana caá. Bitaboó, bitadih jĩgah ennit, ïpĩ teo wáacna caá. Bitaboó, cãacwãdih túi waóhñit pínah ï jumna caá. Bitaboó, ã wēpatjĩh, mácah wéheatjĩh ï naóhna caá.* ²⁹ Yeéb nihat Jesús ã naáwát túutñit nihcan caá. Nihat Dios naáwátdih naóh yapanit pínah, nihat ã naáwátdih bohénit pínah, nihat wēp chãjñit pínahbút nihcan caá. ³⁰ Nihat boonanit pínah, nihat mácah wéheatdih naóhñit pínah, nihat mácah wéheatdih jwúub túut nuúm naóh yapanit pínahbút nihcan caá. ³¹ Jwiít biquínadih nihat jéihyatna ã wiñcan caá. Diosjeh caá ãih cãacwãdih ã jéihyana caá. Chah túini jéihyat pínahdih bidna, jwiít nihatdih caandíh búdí úbát caá náahap. Obohjeéhtih, bitadih jwĩ oyat pínah caá chah náahap. Páñih oina, Túini Espíritu ã wēpatjĩh bitadih jwĩ túi teo wáacpina caá. Jwĩ oican, Túini Espíritu jwiítidih ã teo wáacachah yahna, bitadih jwĩ túi teo wáaccan niít.

13

Oyat

¹ Túini Espíritu ã wēpatjĩh mácah wéheatjĩh wéhenit, bita ï wéheat, ángelwã ï wéheatjĩh wéhena yahna, bitadih jwĩ oicah, dedé pínah nihcan caá. Yéej yáaatjeh caá. ² Túini Espíritu ã wēpatjĩh Dios ã naáwáchah, jwĩ jéih naóh yapana yahna, bitadih jwĩ oicah, dedé pínah nihcan caá. Ded pah Dios

* **12:28** Ef 4.11

ã jumatdih, ã chãjat pínahdihbut táí jéihna yuhna, bitadiah jwĩ oicah, dedé pínah nihcan caá. Jwiít cãacwã jwĩ jéih chãjca naãhdih Dios ã wẽpatjĩh jwĩ jéih chãjat pínahdih táí jenah joiná yuhna, bitadiah jwĩ oicah, Dios ã enechah, dedé pínah nihcan caá.* ³ Nihat jwĩ bíbohatdih moh yéejnitdih jwĩ wãhuchah yuhna, Jesúih doonádih jwĩ naáwát peéh bita jwiítidih ã cáwachah yuhna, bitadiah jwĩ oicah, Dios jwiítidih wẽi encan, táinidih ã wãhcan niít.

⁴ Bitadiah oina, ded pah jwiítidih ã yéej chãjachah yuhna, yéej chãj jwũubacan, táinijeh jwĩ jambipna caá. Bitadiah oina, jĩgah ennit, jwĩ teo wáacbpna caá. Queétdih oina, ãih bíí déedih en ãinahcan, ded pah ã táí yapachah, jwĩ íjcan niít. Pánih oina, queét jwiítidih ã wẽi enat pínah niijná, ded pah jwĩ táí jumat, jwĩ táí yapat, jwĩ táí chãjatdihbut jwĩ naóhcan niít. “Weém nihat jéihni caá. Dedé jadhdat weemdih wihcan caá”, niijní pah jwĩ jumcan niít. ⁵ Bitadiah oina, queétdih jwĩ tíicacan niít. Pánih oina, chah táinidih jwiítjeh bíbohat táut niijná, jwĩ bidcan niít. Pánih oina, ded pah jwiítidih bainí yeejép ã chãjachah yuhna, waícanjeh jwĩ íjcan niít. Jwiítidih ã yéej chãjatjidih jwĩ quíib bũudbipna caá. ⁶ Bitadiah oina, yeejép ã yapachah, yeejép ã chãjachahbut, jwĩ wẽican niít. Obohjeéhtih, táini ã yapachah, yoobópdiã ã chãjachahbut, jwĩ wẽibipna caá. ⁷ Bitadiah oina, ã yéej chãjat doonádih bitadiah naóhcan, ã táí chãjíhatdih jenah joinít, Dios queétdih ã táut nuumát pínahdih jwĩ táí jenah joí cádahcan niít. Pánihna, ded pah jwĩ yapachah yuhna, jwĩ oi

* **13:2** Mt 17.20; 21.21; Mr 11.23

cádaḥcan niít.

⁸ “Ñi míic oyoó”, niíj wʉtnit, Dios “Páant bóojeh tigaá. Yeebdíh bʉʉ oyat náahcan caá”, ã ni-ijcán niít. Obohjeéhtih túttimah, Túini Espíritu ã wēpatjĩh Dios naáwát dih naóh yapaat, mácah wéheatjĩh naáwátbut, ded pah yapatdih, ded pah yapat pínahdih jéihyatbut dedé náahat ã wihcan niít.

⁹ Nin baácboó jam jwʉhna, Túini Espíritu ã teo wáacachah yʉhna, nihatdih túi jéih beedácan, nihat Dios naáwát dihbut túi yoobóp dih jwĩ jéih naóh yapacan caá. ¹⁰ Obohjeéhtih, Jesucristo, túini yoobát jamni, ã jwáub dei jũúwúchah, nihatdih jwĩ jéih beedábipna caá.

¹¹ Nin pah jwĩ jamna caá: Weém wébít jamna, wébít ï jengah joyát, ï wéheat pahbut, weembát jengah joinít, wã wéhenap jĩ. Obohjeéhtih, bʉʉ behe jamna, wébít ï chãjat pah wã chãjcan caá. ¹² Nin pahbut ã jamna caá: Maa quenalih naajĩh jwĩ túi míic encan caá. Pánihat dée Diosdih bʉʉ jwĩ jéih encan caá. Túttimah, jwiít chénaboó caandíh jwĩ míic jwãáh enbipna caá. Nin baácboó jam jwʉhna, Diosdih jwĩ jéih beedácan caá. Obohjeéhtih, ã pehbhoó juibína, jwiít dih bʉʉ ã jéih beedáát pah, jwiítbut caandíh jwĩ jéih beedábipna caá.*

¹³ Nin baácboó jam jwʉhna, jwiít dih nin pah chãjat caá náahap: Diosdih túi jengah joí cádaḥcan, jwiít dih ã túi chãjat pínahdih páantjeh náhnina, caandíh, bitadihbut oi cádaḥcat caá náahap. Obohjeéhtih, oyat caá jwiít dih chah náahap.

14

* 13:12 1Jn 3.2

Mácah wéheat, Dios naáwátdih naóh yapaat

¹ Míic oyat jwiít dih chah ã náahachah yuhna, Túini Espíritu ã jéihyaatnadihbut jwiít dih bidat caá náahap. Dios naáwátdih naóh yapaat wēpatdih chah bidat caá náahap, míic wáac jwinít, ñi jéih míic teo wáacat túut niijná. ² Mácah wéheatjĩh naóhnitboó cãacwãdih wéhecan, Diosdihjeh ĩ wéhena caá. Túini Espíritu ã wēpatjĩh, Dios ã jéihyaatdih ĩ naáwáchah yuhna, nihat cãacwã ĩpĩ beh joicán caá. ³ Obohjeéhtih, Túini Espíritu ã wēpatjĩh Dios naáwátdih naóh yapanitboó cãacwãboodih ĩ wéhena caá. Diosdih chah ĩ táí jenah joyát pínah niijná; ded pah queétdih ã chãjat túutatdih chah táí beh joinít, ĩ jepahat pínah niijná; ĩ jĩgahatdih, ĩ úumatdihbut ã yayát pínah niijná; páant ĩ niij naóh yapana caá. ⁴ Mácah wéheni ãih caolihdihjeh Túini Espíritu ã teo wáacna caá. Obohjeéhtih, Dios naáwátdih naóh yapaniboó Dioíhwã wáac jwinít dih ã teo wáacna caá.

⁵ Yeéb nihat mácah wéheatjĩh ñi wéheatdih náah yacna yuhna, Dios naáwátdih naóh yapaatdih chah wã náah yacna caá. Naóh yapaniboó Dioíhwãdih chah ã teo wáacna caá. Obohjeéhtih, mácah wéheatjĩh naóhni, caandih jwúub túut nuumniijĩh biíc dih naóhnit, Dios naáwátdih naóh yapani biíc yoobó ãihwãdih ĩ teo wáacna caá. ⁶ Wã úudwã panihnitá, weém ñi pehbhoó juibínit, mácah wéheatjĩhjih wã naáwáchah, yeebdih áta teo wáaccan tagaá. Obohjeéhtih, ded pah Dios ã jéihyaatdih naóh yapanit, ded pah jwĩ chãjat pínahdih naóh bohénit, yeebdih wã táí teo wáacap jĩ.

7 Nin pah ã jumna caá: Pelatdih, chíó nahdih yoobópdih jwĩ pójcah, joinítboó jwĩ pójatdih ã beh joicán niít. Bítatdihbut yoobópdih jwĩ bíitcah, bitaboó jwĩjeéh ã jéih eocan niít. 8 Pójat nahdih yoobópdih jwĩ pójcah, joinítboó beh joicán, míic mawatdih teo wáacadih ã bejcan niít. 9 Pánihat dée, joinítíh wéheatjĩh yoobópdih ñi naóhcah, ã beh joicán niít. Ñi naáwáchah yuhna, queétdih dedé pínah nihcan niít. 10 Nin pahbut ã jumna caá: Nin baácboó dawá wéheatna ã jumna caá. Cãacwã ñih wéheatjĩhjuh wéhena, ã míic beh joiná caá. 11 Obohjeéhtih, weemdíh naóhniíh wéheatdih beh joicán, jwĩ jéih míic wéhecan caá. 12 Pánihat pah, joinítíh wéheatjĩh naóhcan, ã beh joicáh, yeebbát queétdih ñi jéih teo wáaccan caá. Pánihna, Dioíhwãdih teo wáacat pínah niijná, Túini Espíritu ã wãhni jéihyaatnadih búdí ñi bidíi.

13 Dioíhwãdih teo wáacat túut niijná, mácah wéheatjĩh naóhniboodíh jwáub túut nuumát pínahdihbut úbát caá náahap. 14 Beh joicán yuhna, wíih caolihboó mácah wéheatjĩh wã túi úbhna caá. Páant wã úbúchah, wíih caolihdih ã teo wáacna caá. Wíih wéheatjĩh wã úbúchah, wíih jenah joyátboodíh ã teo wáacna caá. 15 Pánihna, mácah wéheatjĩh úbhnit, wíih wéheatjĩhbut wã úbhnipna caá. Mácah wéheatjĩh eonit, wíih wéheatjĩhbut wã eobipna caá. 16 Míic wáac joinít, mácah wéheatjĩhjuh Diosdih ñi weñechah, jéih jwuhcanni ñi cãtíh jumna, ñi naáwátidih beh joicán, “Páant tigaá”, ã jéih niijcán niít. 17 “Túina caá, Maá”, yoobópdih ñi niijíchah yuhna, ñi niiját caán jáap joiníiboodíh ã teo wáaccan niít. 18 Mácah

wéheatjĩh yeéb ñi ʉábát chah weémboó pánih ʉábhna, wěinit, “Túina caá, Paá”, Diosdih wāpĩ niijná caá. ¹⁹ Obohjeéhtih, pánih ʉábhna yuhna, Jesúihwā jwĩ míic wáac jwinít, yeebdíh ā teo wáacat pínah niijná, daocánni jacnabitjeh ñíih wéheatjĩh naóhna, chah wāta wěi tagaá. Diez mil jacnadih mácah wéheatjĩh wā naáwáchah yuhna, yeebdíh ā teo wáacah, wāta wěican taga.

²⁰ Wā ʉudwā panihnitá, wébít ĩ jenah joyát pah ñi jenah joicá bojoó. Obohjeéhtih, yéej chājatdih jenah joicánnit ĩ jumat pah yeebbút biíc yoobó ñi jummá. Behnit ĩ jenah joyát pah mácah wéheatna ded pah ā jumat pínahdih túi jenah joinít yeebdíh jumat caá náahap. ²¹ Yeéboó nin pah ñipĩ niij jenah joiná caá: “Dios weemdíh túi wěinit, mácah wéheatdih āt jéihyanap be”, ñi niij jenah joiná yuh caá. Obohjeéhtih, Dios ā wěi enat júutat pínah nihcan caá. Dios naáwátdih naóh yapani Isaías nin pah ā niij daacátjidih ñi túi jenah joyoó: “Dios nin pah ā niijná caá: ‘Wíih judíowādih peéh chājat túut niijná, ĩ pebhna biíh baácdih moondíh wā wahbipna caá. Jātih wā naáwátdih naóh yapanit judíowā ĩih wéheatjĩhjih ĩ naáwáchah yuhna, ĩ jepahcap jĩ. Bʉ peéh chājat túutna, judíowā ĩ wéheatdih wéhecannit ĩ naáwáchah, páantjeh weemdíh ĩ jepahcan niit’, jwĩ Maáh ā niijná caá”, Isaías āt niij daacáp tajĩ.* ²² Pánihna, mácah wéheatna Dios áihwādih ā wěi enat júutat pínah nihcan caá. Ñi míic wáac juyúchah, caandíh jepahcannitboó mácah wéheatnadih joinít, Isaías ā daacátjidih náhninit, Diosdih ĩ jepahcatji jíib ā

* **14:21** Is 28.11-12

peéh chājat pínahdih ī jenah joibípna caá. Obohjeéhtih, yeéb Jesúhwāboó Dios naáwátidih ñi naóh yapanachah joinít, yeebdíh teo wáacnit, jepahcannitboodíh ā teo wáaccan niít. ²³ Míc wáac j̄inít, yeéb dawá mácah wéheatj̄ih ñi naáwáchah, bita jéihcannit, Jesúsdih jepahcannitboó waád j̄inít, “Queét mácah wéheatj̄ih naóhnit jenah joicánnitjeh caá”, ī niij jenah joibípna caá. ²⁴⁻²⁵ Obohjeéhtih, yeéb Dios naáwátidih ñi naóh yapanachah joinít, Jesúsdih jepah jw̄hcani nin pah ā niij jenah joibípna caá: “Weém yéejni caá. Dios ninboó j̄m̄nit, wā jenah joyátidih jéih beedáni j̄m̄na, nitdihbut āt jéihyanap taga”, ā niij jenah joibípna caá. Páant niij jenah joinít, bódicha caj yoh ñajnit, “Dios, meém nihat jéihni, túini caá”, niijnít, Jesúsdih ā jepahbipna caá.

Wáac j̄inít, túinijeh j̄mat

²⁶ Diosdih weñat túut niijná, míc wáac j̄inít, túinijeh chājat caá náahap. Yeéb nihat ñi naáwáchah, ā túina caá. Obohjeéhtih, nihat biícidih ñi niijcá bojoó. Túini Espíritu biquínadidih ewat ā w̄huchah, Diosdih wēi ewat caá náahap. Biíhdih bohéátidih ā w̄huchah, naáwát caá náahap. Biíhdih Túini Espíritu ā jéihyanachah, caandíhbut naáwát caá náahap. Biíhdih Túini Espíritu ā wēpatj̄ih mácah wéheatj̄ih ā naáwáchah, jw̄ub túut n̄um naáwát caá náahap. Pánihna, Túini Espíritu ded pah ā teo wáacachah, Jesúsdih chah túi jenah joyát túut niijná, yeebdíh naáwát caá náahap. ²⁷ Mácah wéheatj̄ih naáwíhna, chénewā, biíc peihcannitjeh biquínajeh ī naáwá naáh. Ī naáwátidih jw̄ub túut n̄um̄nitbut ā naáwá naáh, yeéb nihat ñi beh joyát pínah

niijná. ²⁸ Obohjeéhtih, mácah wéheatdih jwáub túut nuumní pínah wihcah, wáac joinítidih ã naóhca bojo naáh. Caanjéh caolih diítboó Diosdih ã úúbú naáh.

²⁹ Túini Espíritu ã teo wáacachah, Dios naáwátidih biquína ã naóh yapana naáh. Queét ã naóh yapanachah, joinítboodíh túi jenah joyát caá náahap, “¿Túini Espíritu ã naáwát túutni niít?” niíj jéihyat túut niijná. ³⁰ Páant ã naáwáchahjeh, biíhdih Túini Espíritu ã naáwát túutuchah, jwíih naóhnbodíh yayát caá náahap, biíh jwuh ã naáwát pínah niijná. ³¹ Nihat biíc dih naóh yapacan, biquínajeh nihat naóh yapaat caá náahap, nihat míc wáac joinítboó ã bohéat pínah, ã weñat pínah, chah ã túi jumat pínah niijná. ³² Túini Espírituboó ã naáwát túutuchah joiná, naóhni pínahboó “¿Débólíh caá wã naóhbi, queétdih wã túi teo wáacat túut niijná?” niíj jenah joyát caá náahap. ³³ Páant niíj jenah joiná, Dios ã náah yacat pah túinijeh ñi naóh yapabipna caá.

Diosboó nihat Jesúíhwã míc wáacnitdih túinijeh ã chãjat túutat pah, yebdíhbut biíc yoobó ã náah yacna caá. ³⁴ Pánihna, míc wáacna, Dios ã wutatji pah ã weha mánadih jepahna, ñi weha mána yaádh laihsanjeh ã joí chúud ã naáh. ³⁵ Úúbh joíhna, ñih munná jwáub juibínitjeh, ã weha mánadih ã úúbh joyó naáh. Yaádhboó pánih wéhena, bita wáac joinít ã túi joí ñunnátidih ã yéjanachah, ã táican caá. ³⁶ Yeéb míc wáacnit, ded pah ñi túi jumat pínahdih páant wã naáwátidih joíhcan, nindih ñi túi jenah joyó: Jesúíh túini doonáidih yeébboó naóh waóhnit nihcan caá. Yebjéh caandíh jepahnit nihcan caá. Pánih waóhnit nihcan, nihat biíh tútchinadih

moón Jesúihwã yeebdíh ï waáwáchah, ded pah ïpí chãjatdih náhninit, yeebbút biíc yoobó ñi chãjaá.

³⁷ Ded “Weém Túini Espíritu ã wēpatjĩh Dios naáwát dih naóh yapani caá. ã wēpatjĩh weemdíh ãpí jéihyana caá”, niij jenah joiníboó “Dios ã wutad dih ded pah jwĩ míc wáacat dih Pablo yoobóp dih ã naóh yapanap be”, ã niijí naáh. ³⁸ Obohjeéhtih, wã naáwát dih ã joyáh bojochah, bita caandíhbut ï joyáh bojo naáh.

³⁹ Pánihna, wã úudwã panihnitá, Dios naáwát dih naóh yapaat túut niijná, Túini Espíritu ã teo wáacat pínahdih búdí ñi úúbú. “Mácah wéheatjĩh ñi naóhca bojó”, niijcát caá náahap. ⁴⁰ Ñi jenah joyát pah-jeh chãjcan, Dios ã wutad pah táinijeh chãjat caá náahap.

15

Jesús ã boo pud jũúwát

¹ Bũũ wã úudwã panihnitá, Jesúih dooná yeebdíh ded pah wã naáwátjidih wã jwúúb náhniabipna caá. Caán doonádih jwíih jepahnit, bũũbut jenah joinít ñi jamna caá. ² Caán doonádih ñi jepahachah, yeéb iiguípna bejnit déejidih Dios át túi ubup taga. Caán naáwát dih joí cádahcan, ájeéh jumat túut niijná, Dios pebhboó ñi bejbipna caá. Obohjeéhtih, caandíh cádahna, ñi jwíih jepahatji dedé pínah nihcan niít.

³ Weemdíh jéihyani doonádih yeebdíh wã jwúúb naáwáp jĩ. Oboh jamni naáwátjeh nihcan caá. Dios ã niijátji pah biíc yoobó Jesucristo jwĩ yéejat jíib át wun wũhup wut jĩ.* ⁴ Páant ã wunat túttimah, ãih bácahdih ï yohochah, biíc peihcanni yeó jáap

* 15:3 Is 53.5-12

túttimah, Dios ã niijátji pah, ãt jwúub boo pud júúwúp wut jĩ.* ⁵ Pánih boo pud júóhni, Pedrodih ãt jíghop wut jĩ.* Túttimah, ã bohénitjidihbut ãt jíghop wut jĩ.* ⁶ Túttimah, ãihwã quinientos chah ĩ míc wáac juyúchah, queédihbut ãt jwúub jíghop wut jĩ. Biquína queét ennitjiboó ĩ wunuchah yuhna, nihat bitaboó páantjeh ĩ báadh jwuhna caá. ⁷ Túttimah, ã úd Santiagodih ãt jíghop wut jĩ. Pánih jíghonit, nihat ã naáwát túutnidihbut ãt jíghop wut jĩ.

⁸ Pánih jíghoniji jeáboó ã púuh laab béjat túttimah, yeejép wã chãj jwuhuchah, wã jepahat pínah jãtih, weemdíhbut ã jíghop jĩ. Páant ã jíghochahjeh, ã boo pud júúwát dih túi jenah joinít, caandíh wã jepahap jĩ.* ⁹ Jesúihwãdih tubit yeejép wã chãjachah yuhna, Jesús weemdíh jíghonit, ãih doonádih ã naóh jibat túutup jĩ.* ¹⁰ Páant wã jamuchah yuhna, Dios weemdíh oinit, ãt jĩgah enep taga. Pánih jĩgah en túut namnít, Jesúih túini doonádih ã bohé jibat túutup jĩ. Pánihna, weemdíh ã teo wáacatjidih búdí wēinit, bita ã naáwát túutnit chah wã teona caá. Obohjeéhtih, wã wēpatjĩhjih nihcan, Túini Espiritu ã teo wáacachah, Diosdih wã túi teo wuhna caá. ¹¹ Weém, queét bita ã naáwát túutnitbut, jwiít nihat páant Jesúih doonádih jwĩ bohénachah, yeébbóo ñi jepahap jĩ.

Wunnit ĩ jwúub boo pud júúwát

¹² Jesúih doonádih bohéna, ã jwúub boo pud júúwát dihbut jwĩpĩ bohéna caá. Obohjeéhtih, páant

* **15:4** Sal 16.8-10; Mt 12.40; Hch 2.24-32 * **15:5** Lc 24.34

* **15:5** Mt 28.16-17; Mr 16.14; Lc 24.36; Jn 20.19 * **15:8** Hch

9.3-6 * **15:9** Hch 8.3

jwĩ bohénachah joinít, nihat yeéb Jesúsdiñ jepah-
 nit yuhna, ¿Dépanihna “Jwĩ boo p̄d j̄óhcan niít”,
 biquína ñi niij jenah joí? ¹³ Obohjeéhtih, boo
 p̄d j̄úwát ã wihcah nihna, Jesúsboó ãta boo p̄d
 j̄óhcan tagaá. ¹⁴ Jesús ã boo p̄d j̄óhcah nihna,
 ãih doonádih jwĩ bohéat, caandíh ñi jepahatbut
 dedé pínah ãta nihcan tagaá. ¹⁵ Páant ã boo
 p̄d j̄óhcah nihna, Dioíh doonádih yee naóhñitjeh
 jwĩta jum taga. “Dios Jesucristodih ãt booanap
 taga”, jwĩpĩ niij bohéna caá. Obohjeéhtih, boo p̄d
 j̄úwát ã wihcah nihna, Jesúsdiñ Dios ãta boocan
 tagaá. Caandíh ã boocah nihna, yee naóhñit
 jwĩta jum tagaá. ¹⁶ Boo p̄d j̄úwát ã wihcah
 nihna, Jesús ãta boo p̄d j̄óhcan tagaá. ¹⁷ ã
 boo p̄d j̄óhcah nihna, caandíh ñi jepahachah
 yuhna, dedé pínah ãta nihcan tagaá. Yéejat jíib
 páantjeh yeebdíh ãta jum tagaá. ¹⁸ Páant ã boo p̄d
 j̄óhcah nihna, Jesúsíhwã w̄nnit, iiguípna míicjeh
 ãta bej tagaá. ¹⁹ Pánihna, nin baácboó jum jw̄hñit,
 Jesúsdiñ jwĩ jepahachah, ã teo wáacachah yuhna,
 jwĩ w̄nat túttimah páantjeh b̄udná, jwĩitboó chah
 moh yéejnit jwĩta jum taga.

²⁰ Obohjeéhtih, Jesucristo yoobópdiñ ãt boo p̄d
 j̄úwáp tajĩ. Caán caá jwĩih boo p̄d j̄óhni. Caán
 boo p̄d j̄óh waóhni ã jumuchah, jwĩit ãihwãbut
 jwĩ boo p̄d j̄óhbipna caá. ²¹ Adán yéej chãj
 waóhna, ãt w̄n waáwáp tajĩ. Obohjeéhtih, Je-
 sucristoboó yéej chãjcani jumna, w̄nniji ãt boo
 p̄d j̄óh waáwáp tajĩ. ²² Adán yéej chãj waóhni,
 ã w̄nuchah, jwĩit nihatbut yéej chãjnit, jwĩpĩ
 w̄nna caá. Obohjeéhtih, Jesúsboó ã boo p̄d j̄óh
 waáwáchah, jwĩit ãihwãbut jwĩ boo p̄d j̄óhbipna

caá.* ²³ Nin pah ã jumna caá: Jesucristo ãt jwíh boo pud jũúwúp tajĩ. Túttimah, caán ã jwúub dei jũúwúchah, jwiít ãihwãbut jwĩ boo pud jũóhbirna caá. ²⁴ Túttimah, nihat baácđih moón maáta ĩ wēpatđih, nihat nemépwã ĩ wēpatđihbut yap yoh beedánit, nin pah Jesús Diosđih ã nių naóhbirna caá: “Dáa buca, Paá, weemđih ma chãjat tútatđih buu wã péana caá. Buu meemjéh caá wutni”, ã niijbirna caá. ²⁵ Páant ã niiját pínah jãtih, Jesús páantjeh maáh ã jum jwuhah caá náahap, nihat Diosđih en jũihnitđih ã múic mao yap yohat pínah ni-ijná.* ²⁶ Páant ã yap yohochah, jwĩ jwúub wuncan niit. ²⁷ Dios naáwátđih naóh yapani David nin pah ãt nių daacáp tajĩ: “Dios nin pah ã niijná caá: ‘Wã wũáh Jesucristo nihatđih yap yohnit, maáh ã jumuchah, nihat caandih ĩ jepahbirna caá. Obohjeéhtih, weémboó chah maáh jumna, wã wũúhđih wã jepahcan niit’, Dios ã niijná caá”, David ãt nių daacáp tajĩ.*

²⁸ Jesucristo nihatđih yap yoh péanit, ã lípđih “Dáa, buu nihat meemđih ĩ jepahna caá. Weembát meemđih jepahni caá”, Diosđih ã niijbirna caá. Pánihna, Dios chah maáh ã jumbirna caá.

²⁹ Biqúina yeéb Jesúsđih jepah jwuhcan, ñi oinit Jesúihwã ĩ jummat peéh, ĩ mawachah ennit, nin pah ñi nių jenah joyóp be: “Jesúihwã jumna, boo pud jũóhnit, Dios pebhboó ĩ bejbirna caá”, nių jenah joinít, queéđih jwúub enihna, túut nuumnít, ñit daabáát túutur wut be. Obohjeéhtih, boo pud jũúwát ã wihchah, páant ñita chãjcan tagaá. ³⁰ Jesúih doonáđih jwĩ naáwát peéh, jwiitđihbut ĩ mawat dée

* 15:22 Ro 5.12-18 * 15:25 Sal 110.1 * 15:27 Sal 8.6

tobohna caá. Pánihna, “Wã boo pud jũóhcan niít”, niíj jenah joiná nihna, wãta naóh cádah tagaá. ³¹ Wã jéihna caá, yeó jáap jummat pah weemdih ĩ mao yohat dée tobohna caá. Obohjeéhtih, wã naáwáchah joinít, yeéb ñi túut numát dih ennit, búdí wã wěina caá. Pánih wěinit, ã tobohochah yuhna, wã naóh cádahcan niít. ³² Nin Éfeso tátchidih dawá jiowã pah íjnit, Jesúih doonádih wã naáwát jíib, weemdih ĩ mawíhip yuh jí. Pánihna, boo pud jũúwát ã wihcah, dedé pínah áta nihcan tagaá. Jwĩ boo pud jũóhcan, “Waícanjeh jwĩ wunat pínah játih, jwiít dih wěi babh jeémátjeh caá náahap”,* ĩpĩ niiját pah yoobópdih áta jum taga. Obohjeéhtih jwĩ boo pud jũóhbpina caá.

³³ Yee naóh nitdih ñi joyáh bojoó. “Yeejépwãdih pej jumnit, biíc yoobó yeejép ñi jumbipna caá”, bita ĩ niiját dih ñi túi náhninaá. ³⁴ Yeebdíh jwúub túi jenah joinít, yéej chãj cádahat caá náahap. Biquína ñijeéh jumnit Diosdih túi jéihcan, jwiít dih ã boo pud jũúwát tútat pínahdihbut jenah joicán, ĩ yéej chãjna caá. Páant ĩ chãjatdih yeebdíh tíicat caá náahap.

Ded pah táttimah jwĩh bácah ã jummat

³⁵ Biquína yeéb “Jwĩ jwúub boo pud jũóhbpina caá”, jwĩ niiját dih páantjeh beh joicán, nin pah ñi niíj úubh joimí nacaá. ¿Ded pah wunnit ĩ jwúub boo pud jũóhbi? ¿Ded pah ĩh bácah ã jumbi? ñi niíj úubh joimí nacaá. ³⁶ Pánih úubh joiná, ñi túi jenah joicán caá. Momnidih ñi jenah joyoó. Jwĩ momochah, áih jih bóo chóa ã wunuchahjeh, diítmant bóo apĩ chíih jũóhna caá. ã wuncah, áta chíih jũóhcan taga. ³⁷ Chíih jũóhniboó jwĩ momnidih

* 15:32 Is 22.13

biíc yoobó nihcan caá. Pánihat dée jwĩ jwúub boo púd júúwúchah, jwĩih bácahbut mácah ã jumbipna caá. ³⁸ Nihat jwĩ momni chíih júóhmit ded pah ã jumat pínahdih Diosboó át chãjap taga. Biíhnajĩh jwĩ wid momochah, biíc pah jíghni míic ã chíih júóhcan níit.

³⁹ Páant ã jumat dée nihat bácahnabut biíc yoobó nihcan caá. Cãacwã, nuñúpwã, jwébehwã, quee-jwã nihat ĩih bácah mácah ã jamna caá. ⁴⁰ Nihat jeáboó jumni, baácboó jumnibut biíc yoobó nihcan caá. Jeáboó jumni ã túyat mácah, baácboó jumni ã túyatbut mácah ã jamna caá. ⁴¹ Nihat jeáboó jumnibut biíc yoobó ã yeh iigcán caá. Yeóboó mácah, widhboó mácah, cúiwábut mácah ã yeh iigná caá. Cúiwã míicjehbut mácah ã yeh iigná caá.

⁴² Pánihna, momni mácah ã chíih júúwát pah, jwĩ wunuchah, ĩ yohni bácah jwúub boo púd júóhna, mácah ã jumbipna caá. Jwĩ wunuchah, jwĩih bácah ã moópipna caá. Obohjeéhtih, jwĩ boo púd júúwát túttimah, jwĩih jáap bácah ã jwúub moópcan níit. ⁴³ Jwĩ wunuchah, jwĩih bácah ã túi jíghcan caá. Obohjeéhtih, jwĩ boo púd júúwúchah, túini ã jumbipna caá. Jwĩ wunuchah, jwĩih bácah wēpcanni caá. Obohjeéhtih, jwĩ boo púd júúwúchah, túi wēpni ã jumbipna caá. ⁴⁴ Nin baácboó jwĩ jam jwahni bácah ã wunbipna caá. Obohjeéhtih, Dios pebhboó jumni pínah bácah ã jwúub boo púd júóhhipna caá. Nin baácboó jwĩ jumat pínah bácahdih Dios át wūhap wat ĩi. Pánih wūhna, biíh bácah ãjeéh jumat pínahdihbut ã wūhhipna caá.

⁴⁵ Dios naáwátdih daácní nin pah át níij daacáp

tajĩ: “Ã jwĩh chãjni newédih Dios ãih bácahdih caolih jéyanachah, ãt caolih wáyap wut jĩ. Caán newé Adán ãt wūt jumap wut jĩ”, ãt niúj daacáp tajĩ.* Obohjeéhtih Jesucristo, Péeni Adán wūt jumnidih boonanit, ãih bácahdih Dios mácah ãt chãjap wut jĩ. Pánih caandíh boonanit, jwiít dihbut ã boobipna caá, ã pebhboó ãjeéh jwĩ jumat pínah niijná. ⁴⁶ Nin baácboó jwĩ jumat pínah bácahdih Dios ãt jwĩh chãjap tajĩ. Tálttimah, jeáboó ãjeéh jwĩ jumat pínah jáap bácahdihbut ã chãj wũhbipna caá. ⁴⁷ Dios Adándih baácjĩh ãt chãjap wut jĩ. Obohjeéhtih, Jesucristoboodíh jeámant ãt wah deyanap wut jĩ. ⁴⁸ Jwiít nihat Adán jũimená jumna, ãih bácah déedih jwĩ bíbohna caá. Jesucristoíhwã jumna, ãih jáap bácah déedih jwiítbut jwĩ bíbohbiipna caá. ⁴⁹ Bũũ nin baácboó jum jwũhna, baácjĩh chãjni Adán pah jíghnit jwĩ jumna caá. Tálttimah, jeáboó jumna, Jesús pah jíghnit jwĩ jumbipna caá. ⁵⁰ Wã úudwã panihnitá, páant wã naáwát dih jenah joinít, nindih ñi tái náhninaá: Nin baácboó jwĩ jum jwũhni bácah, yéejni jumna, Dios pebhboó yéejat wihcapna ã jéih jumcan niít. Moópni pínah jumna, Dios pebhboó moopát wihcapnabut ã jéih jumcan niít.

⁵¹ Jãt ih Dios ã jéihya jwũhca naáhdih bũũ yeebdíh wã naóhna caá. Nin wã naáwát dih ñi tái jenah joyoó: Jesucristo ã jwũub dei jũúwát pínah jãt ih, nihat jwiít ãihwã jwĩ wũncan niít. Obohjeéhtih, jwĩ wũnat tálttimah, jwĩ wũn jwũhcah, bíic yoobó jwiít nihatdih ã túut nũũmbípna caá. ⁵² Bíic láa quíib pínah bojat pah jwĩ túut nũũmát ã jumbipna caá. Péeni póojat nah ã yáanachah, jwiít nihat ãihwãdih

* 15:45 Gn 2.7

Dios ã tãut nuumbípna caá. ã yáanachahjeh, ni-hat ãihwã wãnnitji jáap bácah jumnit ï jwúub boo pud jũóhbirna caá. ãihwã báadhnitdihbut ã tãut nuumbípna caá.* ⁵³ Bũũ jumni bácah wũnna, ã moópbirna caá. Obohjeéhtih, jwiít dih ã tãut nuumát túttimah, jwĩih jáap bácah jwúub wũncan, ã moópcan niít. ⁵⁴ Páant ã yapachah, Dios naáwát dih naóh yapani Isaías nin pah ã niij daacátji biíc yoobó ã yapbirna caá: “Dios nihatdih ãt yap yohop tagaá. Páant ã yap yohochah, ãihwã ï jwúub wũncan niít”, ãt niij daacáp tajĩ.* ⁵⁵ Dios naáwát dih naóh yapani Oseas nin pah ã niij daacátjidihbut biíc yoobó ã yapbirna caá: “¡Wũnat ã jwúub wi-hcan niít! Pánihna, bũũ jwĩ yéejat peéh wũnatdih jwĩ úumcan caá”,* ã niij daacátji pah jwiít ãihwã wẽinit, jwĩ niijbirna caá. ⁵⁶ Moisésji ã wũtatdih jéihna yũhna, jwiít nihat jwĩpĩ tái jepahcan caá. Pánih jepahcan, “Weém yéejni caá”, jwĩ niij jéihna caá. Páant jwĩ jummatdih jéihnit, jwĩ wũnat túttimah, dedé yéejat peéh chãjatdih úumna, wũnatdihbut jwĩpĩ úumna caá. ⁵⁷ Obohjeéhtih, Jesucristo wũn wũhnit, ã jwúub boo pud jũúwáchah, jwiít ãihwã iiguípna bejnit déeji jwúub boo pud jũóhnit, Dios-jeéh jummat tãut niijná, ã pebhboó jwĩ bejbirna caá. Páant jwĩ jummat pínahdih jéihna, Diosdih búdí wẽinit, “Túina caá”, jwĩpĩ niijná caá.

⁵⁸ Wã úudwã panihnité, yeebdih búdí oinit, nin pah wã naóhna caá: Jesús dih ñi jepah cádahca bo-joó. Bitaboó yeebdih yeenit, mácah ï bohénachah yũhna, joyáh bojnit, yoobóp dih Jesús dih doonádih ñi

* 15:52 1Ts 4.15-17 * 15:54 Is 25.8 * 15:55 Os 13.14

túi jenah joyoó. Pánih jenah joinít, “Diosdih jwĩ teo wāhat b̄udnĩ pínah nihcan caá”, niij jéihnit, ded pah ã chājat tútatdih túi wēinit, ñi chājaá.

16

Ded pah dinerodih wāhat

¹ B̄ud biih naáwátidih yeebdíh wā naóhbipna caá. Jerusalén tútchidih moón Jesúíhwāidih teo wáacat pínah dinerodih ded pah ñi chājat pínahdih wā naóhbipna caá. Galacia baácidih moón Jesúíhwā miic wáacnitdih nin pah wā chājat tútat pah biic yoobó ñi chājaá.* ² Chooát yeó jáap jummat pah débóo dinero ñi wāhat pínahdih yeéb nihat ñi jwejepboó ñi ámohoó. Det ĩ tawat jib búdí bíbohnit, búdí ĩ ámoho naáh. Det bainí bíbohnit, bainí ĩ ámoho naáh. Pánih ámohna, ñi pebhna wā juibínachah, queét moh yéejnitdih ñi wahni pínah dinerodih ñi bíbohbipna caá. ³ Wā juibíát pínah jātih, dinerodih ub bejnit pínah neonádihbat ñi ñíwíí. Páant ñi ñíwichah, juibínit, Jerusaléndih moón Jesúíhwā queétdih ĩ túi jéihyat pínah niijná, wā daác wāhbipna caá. ⁴ Weemdíhbat Dios ã wahachah, queét biicdih wā bejbipna caá. Obohjeéhtih, wā jéih jwahcan caá.

Pablo ã jib bejat pínah

⁵ Nin pah wā jib bejat pínahdih wā niij jenah joiná caá: “Ninmant bejnit, Macedonia baácidih jumni tútchinadih jib bej péanit, Corinto tútchidih moón Jesúíhwā pebhna wā juibíbipna caá”, wā niij jenah joiná caá.* ⁶ “Maatápdih ĩjeéh chāo

* **16:1** Ro 15.25-26; 2Co 8-9 * **16:5** Hch 19.21

jwáhñit, mah noój ã yapat túttimah, biíh tútchina wã bejbipna caá. Páñih chãoníji wã yap bejat túut chãjachah, weemdíh ï jéih teo wáacipna caá”, wã niij jenah joiná caá. ⁷ Páñihna, ñijeéh maatápdih jumíhna, Macedonia baácđih wã jib bejat túttimah ñi pebhboó wã juibíipna caá. Butéh bejna, maatcanjeh wãta jéih jum tagaá. Dios ã náahachah, túi maatápdih ñijeéh wã chão jwáhñipna caá. ⁸ Obohjeéhtih, butéh nin Éfeso tútchiboó Pentecostés yeó jáapnadih páantjeh wã jum jwáhñipna caá.* ⁹ Ninboó dawá wã bohéáđđih íjñit, ï bohéát túutcah yuhna, Dios ã teo wáacatjĩh búdí wã bohénachah, dawá joiná caá ï chãjap. Páñihna, weemdíh ñijeéh jummat caá náahap. Páñih jumñiji Pentecostés túttimah, ñi pebhna wã bejbipna caá.*

¹⁰ Timoteo ñi pebhna ã juibínachah, ã náñni dahwacat pínah niijná, ñi túi teo wáacá. Jwĩ Maáhdih teo wũhni wã jummat pah, caanbát Jesúsđih teo wũhni caá. Páant ã jumachah, caandíh ñi túi en dawaá.* ¹¹ Caandíh yap yohcanjeh, yeéb nihátđih túi joyát caá náahap. Caandíh túi wẽinit, wã jumapna ã jwũub jũúwát pínah niijná, ñi túi teo wáacá. Caán, biíh Jesúíhwã biícđih ï jwũub juyát pínahđih wã bidna caá.

¹² Apolosđih “Bita Jesúíhwã biícđih Corinto tútchidih moón Jesúíhwãđih meembát enedih ma bejeé”, wã wẽp niijíp yah be. Obohjeéhtih, bũũ ã jéih bej jwáhñan caá. Túttimah, débólih ã bejĩhna, ã bejmi dée caá.

Pablo ã pée túyat túutat

* **16:8** Lv 23.15-21; Dt 16.9-11
1Co 4.17

* **16:9** Hch 19.8-10

* **16:10**

13 Bitá ñ yéjeat déedih yap yohat túut niijná, túi jenah joinít jummat caá náahap. Nemépwābut ñ yéjeat déedih úumcanjeh, yap yohat túut niijná, Jesúsdiñ ñi túi jenah joí cádahca bojoó. 14 Pánihna, oinit, bitadiñ túi chājat caá náahap.

15 Wā úudwā panihnitá, niñat Acaya baácdih moón Jesúsdiñ ñ jepahat pínah jātih, Estéfanawā ñ jepahatjidih ñi jéihna caá. Queét Jesúsíhwādiñ búdí ñpí teo wáacna caá.* 16 Pánih teo wáacnit jumna, ñ naáwáchah, ñi túi jepahaá. Bitá queét panihnit maáta, bitá Jesúsdiñ teo wāhñitdiñbut túi jepahat caá náahap.

17 Yeéb Corintodih moondíñ búdí bidna wā chājap be. Pánihna, ñi wahnit Estéfanas, Fortunato, Acaicojñ ñinna ñ juyúchah, búdí wā weñep be. 18 Yeéb biícdiñ jumna, yeebdíñ ñt weñanap tagaá. Biíc yoobó ñinna joinít, weemdíñbut ñ weñanap be. Pánih teo wáacnitdiñ “Ñi túi chājap be”, yeebdíñ niiját caá náahap.

19 Asia baácdih moón Jesúsíhwā míc wáacnit yeebdíñ ñ túyat túutna caá. Aquila, Priscilajñ ñih muúboó míc wáacnit Jesúsíhwābut búdí ñ túyat túutna caá. “Jwí Maáh Jesúsjeéh ñi túi jumna naáh”, niijnít, ñ túyat túutna caá.* 20 Niñat nin Éfeso tátchidih moón Jesúsíhwābut yeebdíñ ñ túyat túutna caá. Yeebbát Jesús ā oyatñ ñi túi míc úúbú.

21 Bññ nin péenibitdiñ weemjéh wā daácna caá. Weembát yeebdíñ búdí wā túyat túutna caá.

22 Ded jwí Maáhdih túi oicannidih Dios ā peéh chāja naáh. Jwí Maáh Jesús waícanjeh ā jwáub dei jéúwú naáh.

* 16:15 1Co 1.16 * 16:19 Hch 18.2

²³ Jwĩ Maáh Jesús yeebdíh búdí oinit, ã teo wáaca naáh. ²⁴ Jesucristo ã oyatjĩh biícdih moon páh yeéb nihatdih búdí wã oina caá.

Páant bóojeh tigaá wã naáwát.

Pablo

Dios ã jáap naáwát tólih New Testament in Cacua

copyright © 2008 Wycliffe Bible Translators, Inc.

Language: Cacua

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cacua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 11 Nov 2022 from source files
dated 29 Jan 2022
34c9543b-57a6-5290-ab7b-4fa15529a7e2